

Ndudu Ì Nì Dàcùní Dios San Juan

Ñà-nduá cachitnùhu nùù tutu yohó

¹ Tutu yohó nduú tutu ndé cachitnùhu Jesucristu ñà-nduá sà-ìtúú vàxi cuu. Nùù Yua-nda Dios nì nìhì Jesucristu palabra yohó ñà-dacúndéhe-yá nsi-daa nèhivì xinúcuáchí nùù-yá. Iin ángel mozo xi-ya nduú ana nì cachitnùhu xi palabra yohó, te nì inini yùhù. Juan naní, te nduú stnàì iin nèhivì xí mii-yá.

² Nùù tutu yohó cáhàn Yua-nda Dios; te itándiaa stná palabra xi Jesucristu, xì stná nsidaa ñà-nduá nì xini yùhù. Yùhù testigu nduí, te nsidaa palabra itándiaa yohó, ñà-ndáà nduá.

³ Ndiaha gá coo xi ana cahvi xi tutu yohó, xì stná nèhivì iníní xân, nú ni chívàha-ne ñà-nduá cachá'; vàchi palabra nì quixi nùù Dios nduá, te sà-ìtúú cuu ndisa ñà-nduá (cachitnùha).

Nansa nì casàhú Juan xì nèhivì xí Dios, ndoó nùù ùsà ñuu

⁴⁻⁵ Yùhù Juan, cásàhùì xì nsidaa mii-nsiá nèhivì natácá càhvì xì-yá xíndoo ùsà ñuu ladu Asia. Ni cuní mánì-yá mii-nsiá, te ni ndóo vàha inì-nsia quida-ya. Ducán cuní-yà cuu xi-nsiá, divi mii-yá ana itiácú nicanicuahàn. Dècuèndè nicanicuahàn iá-yà, te ndè nicanicuahàn quivì nùù-xí icúmí-yá coo-ya. Te ducán cuní stná ùsà espíritu ndiaha itá ladu nùù silla ndiaha xí-yá. Tè ducán cuní stná Jesucristu, divi ana nì cachitnùhu xi-nda puru palabra ndàcuisì. Làcà mindaa mii-yá

nduú ana nì natiacu primeru, làcà mindaa-yá cusáhnû nùù nsidanicuú ana dandacú ñuhiví yohó. Ansivéhé-yâ, cuú ini-yà sàhà-ndà, te sàhà nùù-yá (nì xità), ñàyùcàndùá nì ndoo cuàchi-nda nì quida-ya. ⁶ Sàhà mii-yá sàni nìhítáhvì stná-ndà chuun ñà-dandacu-nda, xì stná chuun nahi chuun xi dùtù ñà-cunucuachi-nda nùù mii-yá ana cahvi-yá, divi Yuandiáhá-yâ. Pues vichi nùù mii-yá ni coó tñũñuhu xí nsidanicuú nèhivì, te nicanicuahàn ni cúsáhnû-yá nùù-ndà, amén.

⁷ Cunaha-nsiá, icúmí-yâ naxicocuñin-yâ. Mahì vïcò icúmí-yâ nuu-ya tùi-ya nùù nsidanicuú nèhivì. Te icúmí cundehè stná nèhivì (nì xicàn) ni quíhvì lanza làcà-yá. Dandu yáha ga tnana fuerte nsidaa nèhivì nsidanicuú ñuu iá ñuhiví na cuni-nèyà. Ducán icúmí coo, cachí.

⁸ Cachí mii-yá: “Nicanicuahàn ié`. Sàhà yùhù nì sàcòo nsidaa iñàha, te còò ni-iñàha chicá cunaha nùù. Ñàyùcàndùá, ducán nduí nahi letra nuu nani A, te ducán nduú stnái nahi letra dansihí nani Z”.

Ducán cachí mii-yá ana nduú Dios vivu, vèchi dècuèndè sàhà iá-yà, te nicanicuahàn coo stná-yà quivì vèxi xi-nda, te nsidanicuú iñàha, vátùni quida-ya.

Nansa nì nìhítáhvì Juan nì dácùnì Dios-nè Jesucristu, te ndiaha gá-yà

⁹ Yùhù Juan, iin-ni nduú stnái dèhe Dios nahi mii-nsiá, iin-ni ndohó stnái sàhà-yá, te iin-ni ndiatú stnái sàà quivì cusahnú Jesucristu, te quidándéé inì dècuèndè sàà quivì mà. Cunaha-nsiá, yucán nìsa ìe ñuu nani ñuu Patmos, iin ñuu indúhu mahì mar. Divi sàhà-ñá nchícùn Palabra xi mii-yá, ñàyùcàndùá nì sài yucán (nì

quida tè-xídandacú), vèchi vate nì cachì ié` ladu xi Jesucristu, ñàyùcànduá nì sàì yucán. ¹⁰ Te nì cuu iin quivì (domingu), divi quivì xí mii-yá, te ié` ndahà Espíritu ìì xí Dios, na ian sánì`, dandu nì tiacu cáhàn-yà yàtí, fuerte iá tàchì-yá, na ian sivi corneta. ¹¹ Te dohó nì cachi-yà:

—Nicanicuahàn ié`; sàhà yùhù nì sàcòo nsidaa iñàha, te còò ni-iñàha chicá cunaha nùí, vèchi nahi letra A nduí, xì nahi letra Z. Vichi icúmí-yô tiau nùù tutu nsidaa ñà-nduá nì xinù, te dasàà-ñà nùù nèhivì-xí ndoó ùsà ñuu ladu Asia. Dohó nani ùsà ñuu yucán: ñuu Éfeso, xì ñuu Esmirna, xì ñuu Pérgamo, xì ñuu Tiatira, xì ñuu Sardis, xì ñuu Filadelfia, xì ñuu Laodicea, ducán nani ñuu yucán —nì cachi-yà.

¹² Daaní, nì nacuícoé yàtí ñà-cundehí ana cáhàn, te primeru nì xinì yucán itá ùsà candelero. Oro nì cuyucàn, te itá iin isì xíxìn. ¹³ Daaní, mahì ùsà isì mà nì xinì jaàn iín mii-yá, na indéhe nèhivì indéhe-yá, ndixí-yá iin dùhnù quihín sàà ndè dìquì sàhà-yá. Te nchìca-ya nuhní iin siuhma nì cuyucun oro. ¹⁴ Cuxín yaa ididínì-yá nahi idì nì ndoo, ò nahi yùhà. Te nduchínúù-yá, tnúà nahi ñuhu. ¹⁵ Daaní, sàhà-yá, yéhè nina-ña na iin càa yahá nì dàà titi ini xitnù. Te fuerte cáhàn stná-yà na ian cahá tèñuhu cuàhà. ¹⁶ Te ndahà cuàhá-yà iníndáhá-yâ ùsà sitnúù, te iníyúhú-yâ na iin espada diín ndúì ladu-xi. Daaní, nùù-yá, nchiá na ian nchií fuerte orá.

¹⁷ Ducán nì xinì mii-yá, dandu nì nduè sàhà-yá na ian sàni xihì. Doco ndahà cuàhá-yà nì tnii-ya ìqué, te nì cachi-yà:

—Còó, màsà yúhû. Cunahu, sàhà yùhù nì sàcòò nsidaa iñàha, te còò ni-iñàha chicá cunaha nùí. ¹⁸ Te vichi itiácuì. Ñà-ndáà nduá nì xihì, doco sàni natiacuì, te nicanicuahàn icúmí cutiacuì. Yùhù nduú ana dandacú sàhà nsii, nansa cuu xi-né, te dandacú stnài sàhà andea (ana cùhùn yucán). ¹⁹ Vichi tiaa-yó nsidaa ñà-nduá nì xinù yohó, te tiaa stná nansa iá tiempu vichi, xì nansa icúmí cuu stná quivì nùù-xì. ²⁰ Cunahu, cuàhìn cachì xùn ndià nduá cuní cachì ùsà sítnúù iníndáhá ndahà cuàhí nì xinù. Te cuàhìn cachì xùn ndià nduá cuní cachì ùsà candeleru oro yohó. Pues, ùsà sítnúù yohó, xíndua ùsà nècuàchì cachítnúhu palabra-xi. Te ùsà candeleru oro yohó, xíndua ùsà grupu nèhivì natácá iníní xí palabra xi mà ndé ùsà ñuu yucán.

2

Razón nì dàsáà Jesús nùù nèhivì xí-yá ñuu Éfeso

¹ Vichi, tiaa-yó iin tutu cùhùn nùù nècuàchì cachítnúhu palabra xi ñuu Éfeso, dandu cahvi-neà cunini nsidaa nèhivì-xí ndoó ñuu yucán. Dohó tiaa: Yùhù nduí mii-yá iníndáhá ùsà sítnúù ndahà cuàhí, te xicánuí mahì ùsà candeleru oro, te dohó cachí xì-ní: ² ináhí nansa quida-ní vida xi-ní. Ináhí nansa nì sàhandee inì-ní quida-ní (chuun xi), te nì quidandee inì-ní. Te nèhivì malu, có-cùdî inì-ní modo xi-ne. Te dava nèhivì, nì cachì-nè xínduu stna-ne ana nì nihì chuun nùí, doco còó, mà ndìsá. Dandu mii-ní, nì nanducu váha-ní sàhà ñà-nduá nì cachì-nè, te nì cundaà inì-ní, tnuhu-né. ³ Cuàhà gá sàni quidandee inì-ní, mate cuàhà vida nì yàha-ní sàhà yùhù, doco iin-ni sàni quida-ní chuun xi, cóni nácóó-nià. ⁴ Doco cunaha-ní, có-cùdî

inì sàhà iyuhu ñà-ndùá quida-ní, vàchi có-cùú gà inì-ní sàhí nacua nìsa cuu inì-ní sàhí dihna. ⁵ Ñàyùcàndùá, nsinuu inì-ní nansa nìsa ìa-ní nà táñàha ga quida-ní falta, te naxicocuñ inì-ní sàhà falta mà, te quida tu-ní nacua nì saquida-ní antes. Vàchi nú coó, sàì ndé iá-nî, te dacúxióé candeleru xi-ní, nú màsà nàxícócuñ inì-ní. ⁶ Doco iá iin ñà-vàha quida-ní, vàchi có-xiñhù-ní modo xíquida tè-nicolaíta. Yùhù, ni-iyuhu có-xiñhùí ñà-ndùá quidá témà.

⁷ Nsidaa mii-nsiá nècuàchì natácá càhvì xì Dios, ni cúníní vaha-nsia ñà-ndùá cachí Espíritu Ìì xí-yá, vàchi dohó cachí-yà: Nú ni cúndéé-nsiá nùù nsidaa ana cuní datúcù xì-nsiá, dandu nùù yùhù nìhìtáhvi-nsiá caxì-nsiá quisi vídì caná nùù yutnù ndiaha iín ndé iá ñuu ndiaha Dios, vàchi fruta mà cutiacù-nsia nicanicuahàn.

Razón nì dàsàà Jesús nùù nèhivì xí-yá ñuu Esmirna

⁸ Daaní, nùù nècuàchì cachítnùhu palabra-xi ñuu Esmirna, dohó tiaa-yó, dandu cahvi-neà cunini nsidaa nèhivì-xí ndoó ñuu yucán: Cunaha-ní, sàhà yùhù nì sàcòò nsidaa iñàha, te còò ni-iñàha chicá cunaha nùú. Ndisa, nì xihì, doco sàni natiacuì. ⁹ Yùhù ináhí ñà-ndùá quida-ní, ináhí nansa yáha-ní cuàhà tnùndoho quidá nèhivì. Ináhí ndahví dahuun yáha-ní. Doco cunaha-ní, nùù yùhù cuica-ní. Te ináhá stnàì nansa quidá dava nèhivì, quini ndatnúhú-nê sàhà-ní, nècuàchì raza Judea xínduu-ne, cachí-nè, doco còó, mà ndisá. Nèhivì natácá cuenta xi ñà-malu xínduu-ne. ¹⁰ Vichì icúmí-nî ndoho gà-ní quida nèhivì, doco màsà yúhí-nî ñà-ndùá icúmí-nî yàha-ní. Dècuèndè

cundiadi stná dava-nsia quida ñà-malu. Doco cunaha-nsiá, sàhámà vátùni cundaà inì-xi, a xiníndísá ndisa-nsia. Ûxìn quìvì coo tnùndoho ma. Doco mii-ní, iin-ni cunindisá viì-ní, mate ni cuí-ní quida-ne, dandu nìhìtáhvi-ní iin ñà-vàha nùí, divi ñà-cutiacù-ní vida (ndiaha nicanicuahàn).

¹¹ Nsidaa mii-nsiá nècuàchì natácá càhvì xì Dios, ni cúníní vaha-nsia ñà-ndùá cachí Espíritu Ìì xí-yá, vachi dohó cachí-yà: Nú ni cúndéé-nsiá nù ana cuní datúcù xì-nsiá, dandu mà sáà-nsia cui-nsia ùì xichi (nahi nècuàchì dava ga).

Razón nì dàsàà Jesús nù nèhivì xí-yá ñuu Pérgamo

¹² 'Daaní, nù nècuàchì cachítñuhu palabra-xi ñuu Pérgamo dohó tiaa-yó, dandu cahvi-neà cunini nsidaa nèhivì-xí ndoó ñuu yucán: Yùhù nduí ana nihi-xi espada diìn ndúì ladu xi. ¹³ Yùhù ináhí ñà-ndùá quida-ní; ináhí nansa iá ñuu ndé iá-nî, vachi mero ñuu ndé dandacu-guá ñà-malu nduá yucán. Doco ináhí mii-ní ñà-iin-ni nchícùn-ní yùhù, te ndácùcahan-ní quìvì, cóni nácuáa-ní yùhù, iin-ni xiníndísá-nî, mate yucán nì sahnì-té iin ana nì cachi vate iá-nè ladu xi, cóni chídèhé-nèà. Divi nduú Antipas, te yucán nì xihì-nè ñuu ndé iá fuerte guá ñà-malu. ¹⁴ Doco, cunaha-ní, có-cùdî inì sàhà iyuhu ñà-ndùá quida-ní. Vachi jaàn ndé iá-nî ndoó stná dava nècuàchì nchícùn ley xi Balaam. Divi Balaam mà nduú nècuàchì nì càhàn xì tè-Balac sàhana, nì cachi-nè xì tèmà nansa chiyuhù-té nècuàchì Israel ñà-quida-ne ñà-có-ndiá ìcà-né, nì chiyuhù-ténê caxì-né promesa nì sàcòo nù figura cahvi nèhivì, te nì chiyuhù stná-tené ñà-càhàn-nè xì nèhivì cóni nandàhà xì-né. ¹⁵ Daaní, jaàn ndé iá-nî ndoó stná dava nèhivì nchícùn ley xi

tè-nicolaíta. Cunaha-ní, ni-iyuhu có-xiñhí ley mà.
 16 Ñàyucànduá, naxicocuïn inì-ní. Te nú coó, yàchì sàì ndé iá-nî, te cuàhi mii-né castigu xi-ne. Sàhà espada iá yuhí, ñà-jaàn nihì-né castigu.

17 'Nsidaa mii-nsiá nècuàchì natácá càhvì xì Dios, ni cúníni vaha-nsia ñà-nduá cachí Espíritu Ìi xí-yá, vachi dohó cachí-yà: Nú ni cúndéé-nsiá nùu nsidaa ana cuní datúcù xì-nsiá, dandu nihítàhvì-nsiá cuxi-nsia comida ndiaha iá dèhé (nùu Dios), divi nduú maná ndiaha. Te dacútàhvì stnái iin iin-nsia iin iin yùu siòcò ndé itúú quìvì saa iin iin-nsia. Còò inga ana cunaha xi quìvì yucan, cuisì ana cutahvì xì yùu mà.

Razón nì dàsáà Jesús nùu nèhivì xí-yá ñuu Tiatira

18 'Daaní, nùu nècuàchì cachítñuhu palabra-xi ñuu Tiatira dohó tiaa-yó, dandu cahvi-neà cunini nsidaa nèhivì-xí ndoó ñuu yucán: Yùhù nduí Dèhemanì Dios, te nduchìnúí, nchiá na ian tnúu ñuhu, te sàhí, yèhè-ñà nahi càa yahá. Te dohó cachí xì-ní, 19 ináhí nansa quida-ní, te ináhí cuú inì-ní sàhà ñanìtnaha-ní. Daaní ináha stnái nihnú inì-ní yùhù, te ináha stnái nansa chindéé stnahá-nsiá xì nansa quidá ndee inì-nsia (nú iá tnùndoho), te ináhá stnái iá cuàhà obra xi-ní, te vichi más iá obra xi-ní nùu antes. 20 Doco cunaha-ní, iá iyuhu ñà-dìsàhà-xí có-cùdì inì quida-ní, vachi sàha-ní permisù chináhá nècuàchì ñahà nani Jezabel. Dios dacáhàn xì-né, cachí-né, (doco còó). Dacuahá-né nèhivì-xí, te datúcù-nè nècuàchì mà, vachi cachí-né iá permisù càhàn nèhivì xì ana cónì nándàhà xì-né, te vètùnì caxì stná-nè promesa nì sàcò nùu figura cahvi nèhivì. (Ducán cachí ñahà mà.) 21 Pues, yùhù, nì sandiatui,

áma naxicocuñin ini-nè sàhà cuàchi quidá-né xì nècuàchì tiàa, doco còó, cónì naxícócuñin ini-nè. ²² Ñàyucàndüá, icúmí-nê quicuehè-nè quide, te cunduhù-né. Stná tiàa ni caquida xì cuàchi ma, icúmí stná-nè ndoho cuahà-né nú màsà cúú-né arrepentir sàhámà. ²³ Stná dèhe nècuàchì ñàhà mà, icúmí stná-nè quicuehè-nè, te cui-nè. Dandu nsidaa nèhivì-xí ndoó nsidaa ñuu, sàhámà cundaà ini-nè ñà-yùhù ináhì nansa nihnú ini nsidaa nèhivì ini saxinítnùnì-nè, te según nansa quidá iin iin-ne, ducán icúmí-nê nihì stná-nè núì. ²⁴ Doco vichi cuàhìn cachì inga iñàha xì nsidaa mii-nsiá jaàn có-nchícùn xì ley (chicuéhè) mà, vàchi có-dàcuahá-nsiá palabra sìquini sàhà ñà-malu, palabra cachí-nè palabra dèhé. Cunaha-nsiá, mà cáchí guè xì-nsiá ni inga iñàha chivàha-nsia, ²⁵ cuisì ñà-ndüá sàni nihì-nsiá chivàha-nsia ndè vichi, divì ñà-jaàn quida ndisa-nsia seguir dècuèndè quivì nasai ndé ndoó-nsiá.

²⁶ 'Iin nèhivì, nú ni cúndéé-nê nùù nsidaa ana cuní datúcù xì-né, te iin-ni quida ndisa-ne ñà-ndüá cachí dècuèndè quivì último, ndiaha gá coo xi-né. Vàchi icúmí-nê nihítáhvi-né dandacú stná-nè nùù cuahà ñuu ñuhivì. ²⁷ Nahì yùhù, nùù Yuamáni' ni nihítáhvi' cusahnú nùù ñuhivì, ducán icúmí stná mii-né cusahnú stná-nè, cunindaha-né iin vara càa cunduu seña, te nèhivì (có-iníni, ndahví-ne), vàchi yáha ga fuerte icúmí-nê nàni fuerte-nè na ian cháh mà iin quidi còò chuun-xi. ²⁸ (Doco nèhivì nchícùn viì xì'), icúmí-nê nihítáhvi stná-nè cucumi-né sìtnùù cahnú xínu dàtnàa. ²⁹ Nsidaa mii-nsiá nècuàchì natácá càhvi xì Dios, ni cúninì vaha-nsia ñà-ndüá cachí Espíritu ìì xí-yá.

3

Razón nì dàsàà Jesús nùù nèhivì xí-yá ñuu Sardis

¹ 'Daaní, nùù nècuàchì cachítñuhu palabra-xi ñuu Sardis, dohó tiaa-yó, dandu cahvi-neà cunini nsidaa nèhivì-xí ndoó ñuu yucán: Yùhù nduí ana icúmí xi ùsà espíritu ndiaha xí Dios, te iníndáhá stnái ùsà sìtnùù. Te dohó cachí` xì-ní, ináhí nansa quida-ní. Mate iá fama-ní quidá vii-ní, doco nùù Dios ndahví iá anima-ní na ian sàni xihì-ní.

² Ñàyùcàndüá, cuidadu coo-ní, te cundiaà-ní anima-ní ñà-màsà ndáñúhú ni-iin ñà-vàha ñuhú anima-ní, vèchi iyuhá iá`, te vihi-ni ndañuhá. Cunaha-ní, mà víi sàni quida-ní nùì, sàni xinì. ³ Sàhà ñà-jaàn, nsinuu inì-ní nansa iá palabra ndiaha nì cachì xì-ní antes, te nì inini-ní. Pues divi ñà-jaàn nduá cuní chivàha-ní vichí, te naxicocuín inì-ní sàhà cuàchi-ní. Vèchi nú màsà nácúníhnú vii inì-ní, te coo tùha-ní, dandu yàchì màsàì ndé iá-ní. Nanáà sàì yucán, te ni mà cúndáà inì-ní índù hora sàì. ⁴ Doco ndoó itnii nèhivì (vàha) jaàn ndé iá-ní ñuù-ní Sardis, te mii-né, cóni cùchícuéhé anima-nè. Ñàyùcàndüá, icúmí-nè cutnahá-né xì` na cacanui, te iin-ni cundixi stná-nè sìcoto cuxín na ian mií, vèchi ducán nátùì-ne nìhítáhvi-né nùì.

⁵ Cunaha-ní, nú ni cúndéé iin nèhivì nùù nsidaa ana cuní datúcù xì-né, dandu nìhítáhvi stná-nè cundixi cuxín-nè. Te mà nunca dandutí quivì-né nùù tutu xi vida ndiaha. Te claru icúmí cachì xì Yuandiáhí ñà-divi nèhivì-xí nduú, nècuàchì xiníndísámá; te divi ducán cachì stnái xì àngel xi-ya. ⁶ Nsidaa mii-nsiá nècuàchì natácá càhvi xì Dios, ni cúníní vaha-nsia ñà-ndüá cachí Espíritu ìì xí-yá.

Razón ni dàsàà Jesús nùù nèhivì xí-yá ñuu Filadelfia

⁷ 'Daaní, nùù nècuàchì cachítñuhu palabra-xi ñuu Filadelfia, dohó tiaa-yó, dandu cahvi-neà cunini nsidaa nèhivì-xí ndoó ñuu yucán: Yùhù nduí ana ìì, te puru ñà-ndácuìsì cáhìn. Yùhù nihí ndahàcáa xi rey David, te nú sàni nacune iñàha, còò ni-iin ana cui nacadi xán, te nú sàni nacadi, mà cúí gá nuna. Ñàyùcàndüá, ducán cachí xì-ní, ⁸ ináhî nansa quida-ní. Te cunaha-ní, nuná ñuhiví nùù-ní nahi yehè nuná, te còò ni-iin cui nacadi xán. Vàchi mate có-ndùú-nsiá nehivì chicá icúmí fuerza, doco vätùni, sàni chivàha-nsia palabra-xi, cóni nácuáa-nsiá yùhù. ⁹ Doco jaàn ndoó dava nèhivì cachí-nè xínduu-ne (nèhivì ndi-aha), nèhivì raza Judea nduú-né, cachí-nè, doco tnuhu-né, vachi xínduu nsihi-ne ana nchícùn xì ñà-malu. Pues, yùhù icúmî datnátui mii-né nùù-ní ñà-cuitasisi-né nùù-ní, te quidañuhu-né mii-ní, dandu cundaà ini-nè, màni-ní nùí. ¹⁰ Cunaha-ní, vaxi iin tiempu ùhì inicutu ñuhiví na icúmí nèhivì ndoho-ne, te cundaà inì-xi nansa ndisa iá an-ima-nè. Doco mii-ní, mà cuáhi cunì-ní tiempu mà, vachi iin-ni sàni quidandee inì-ní (nì xinindisa-ní) nacua sàni cachí xì-ní. ¹¹ Cunaha-ní, yàchì icúmí nasai ñuhiví. Ñàyùcàndüá, nacua sàni sàà-ní quida vii-ní, iin-ni quida-ní seguir ducán, màdí nìhì inga nèhivì ñà-ndüá cuàhàn cunduu premiu xi-ní.

¹² 'Nsidaa nèhivì-xí, nú ni cúndéé-nê nùù nsidaa ana cuní datúcù xì-né, dandu iin-ni icúmí-nê cundoo-ne nùù Dios na ian nduú-né iin castillu vehe ndiaha-yá, vachi mà quéé gá-nè nùù-yá. Te ìcà-né icúmî chituu stnàì quivì Dios-xi, xì quivì

sai, xì stná quivì ñuu Dios-xi, divi Jerusalén Saa, vàchi ndè ansivi ndé iá-yà icúmí nuu ñuu mà quixa. ¹³ Ñàyùcàndüá, nsidaa mii-nsiá nècuàchì natácá càhvì xì Dios, ni cúníní vàha-nsia ñà-ndüá cachí Espíritu Ìì xí-yá.

Razón ni dàsàà Jesús nùù nèhivì xí-yá ñuu Laodicea

¹⁴ 'Daaní, nùù nècuàchì cachítñuhu palabra-xi ñuu Laodicea, dohó tiaa-yó, dandu cahvi-neà cunini nsidaa nèhivì-xí ndoó ñuu yucán: Yùhù nduí ana chicá seguru. Micuísì ñà-ndácuìsì cáhìn, mà dándáhvî, te divi ndahà yùhù nì cuyucun nsidaa iñàha iá ñuhiví xi Dios. Te ducán cachí` xì-ní, ¹⁵⁻¹⁶ ináhî nansa quida-ní. ¡A sácú vàha coo dahuun-ní ladu xi, te ò claru cachì-ní mà cóó-nî ladu xi! Vàchi yùhù ndaníhí mii-ní nahi tècuìí có-xihí viì, ñà-mà íhní-tè ni mà víxin-tè, te ñàyùcàndüá, vihini dacúxíóí mii-ní nùí, na ian quidá nèhivì xì tècuìí có-xihí víí, sasí-nète. ¹⁷ Vàchi dohó cachí-ní: Sà-íá ñà-cuìqué. Cuàhà biene xi, còò ni-iin necesidad icúmî, cachí-ní. Te ni có-cundáà inì-ní ñà-mii-ní nduú ana iá tñundoho xi, te mii-ní nduú ana chicá ndahví ini anima-xi, te quidámáxiní stná-ní. Vàchi nùù yùhù, mii-ní nduú ana chicá ndixí ndahví, (vàchi ndahví iá anima-ní), te sàhámà chicá vàha cuhi inì-ní mii-ní. ¹⁸ Ñàyùcàndüá, iin palabra viì cachí` xì-ní, chicá vàha (nàcùnihu viì inì-ní), dandu nihì-ní ñà-cuicà ndisa nùí, divi ñà-ndüú nahi oro nì dàà, te nì cundaà inì-xi, vàha-ña. Te xiñuhu stná (ñà-naquida viì-ní) na ian cuàhàn-ní cuiin-ní sìcoto cuxín nùí ñà-màsà cóó chaa gá-ní (nùí), te ducán màsà cúcáhán nùù-ní. Daaní, xiñuhu (ñà-cundehè-ní

cuisì ichì váha. Vàchi nú ducán, dandu queamá na ian cuàhàn-ní) cuiin-ní iin tàtnà nùì, te cutatna nduchìnùù-ní, te natùinuù-ní. ¹⁹ Cunaha-ní, nsi-daa ana cuú inì sàhà-xí, sáhi-nè conseju, te danáni stnái-nè dava xichi. Ñàyùcàndùá, nacani vaha inì-ní, te naxicocuïn inì-ní sàhà falta xi-ní.

²⁰ 'Pues, ducán iá na ian cáhìn yehè nèhivì, áma cunini-ne, te nacuna-ne quìhvi cutnahí xì-né, vachi nahi vicò ndé cundoo-nda cuxi vaha-nda, ducán queamá. Ñàyùcàndùá, cáhìn xì ndéni nèhivì nì cui áma cunini-ne, te quìhvi.

²¹ 'Cunaha-ní, ndéni nèhivì-xí, nú ni cúndéé-né nùù nsidaa ana cuní datúcù xì-né, dandu icúmí-né cutnahá stnà-nè xì' ndè (gloria) ndé coo stnà-nè nùù iin silla ndiaha dandacú-né nacua nì quida yùhù, nì cundeí, dandu nì sàcòì silla ndiaha xí, te vichi cutnàhî xì Yuamánì' dandacú stnái. ²² Nsidaa mii-nsiá nècuàchì natácá càhvì xì Dios, nì cúnínì vaha-nsia ñà-ndùá cachí Espíritu ìì xí-yá, —nì cachi Jesús.

4

Nansa cahvi-né Yua-nda Dios ansivi

¹ Daaní, nì nsihi nì xinì ñà-jaàn, dandu nì nuna iin yehè ansivi nì xinì. Te nì tiacu tàchì-yá cáhàn-yà xì' na ian nì cáhàn-yà xì' daa. Divì na ian sívì corneta, ducán tiacú, te nì cachi-yà xì':

—¡Nahà-ní dìquixí yohó! Cuní dacuní mii-ní nansa cuàhàn cuu quivì vaxi xi-nda.

² Dandu vichi vichi ducán nì sàcòì na ian sánî nì quida ndudu ìì xí Espíritu xi Dios. Te nì xinì yucán ndè gloria iín iin silla ndiaha ndé iá mii-yá.

³ Na iin yùù yéhè jaspe, ò iin yùù yéhè cuahá,

ducán náhà-yà. Te diquì stná silla mà iin iin sìcòyàhnchì, na iin yùù yéhè cuií nani esmeralda, ducán náhàmà. ⁴ Te nsidanicuú ladu silla xi-ya itá stná silla cuachi. Cuahani ndáa-nù, òcò cùmì-nù, te nùù iin iin-nù ndoó iin iin nècuàchì sahnú. Sìcoto cuxín xíndixi iin iin-ne, te xíñuhu stná corona dìni iin iin-ne. ⁵ (Te nì xini), yucán silla cahnú xí-yá, yáha gà tása, te na ian cáhàn dàvi, ducán tiacú, te ndee níhi stná. Te frente silla mà itá ùsà ñà-xìxìn nduú ùsà espíritu ndiaha xí Dios. ⁶ Te frente stná silla mà iá stná nahi mar nì cuyucun vidriu, ducán náhà lugar mà, te yéhà na iin yùù nchíí ndai.

Daaní, nsidaa ladu mii-yá itá iin iin ana itá. Cùmì nduú-né, te iá stná cuàhà nduchínúù-né ladu nùù-né xì ladu yàtà-né. ⁷ Iin-ne, na iin nsicaha iá-nè; te inga-nè, na iin buey iá-nè, te inga-nè, nùù nèhivì nihí-né; te nècuàchì cùmì, na iin águila ndavá ansivi, ducán iá-nè. ⁸ Te iin iin-ne, iá iñù ndìxìn-né, te iá chitu stná nduchínúù-né ìcà ndìxìn-né. Te tìxi stná ndìxìn-né iá stná cuàhà nduchínúù-né. Te nicanicuahàn ndui te ñuú ducán cána-ne cachí-nè dohó:

ìì gá mii-yá, divi mii-yá dandacú nùù nsidanicuú iñàha. ìì gá-yà. Ndè sànaaha iá-yà, te vichi iá-yà, te ndè nicanicuahàn icúmí-yâ coo-ya. ìì gá-yà.

⁹⁻¹⁰ Ducán cachí-nè, ndaníhí cahnú-né mii-yá, te tavá-né tnùñuhu xí-yá, naquímànì-néyà, divi mii-yá iá nùù silla ndiaha, te itiácú-yà nicanicuahàn. Daaní, cada cachí-nè ducán, dandu cáhàn stná òcò cùmì nècuàchì sahnú yucán, tutúyúhú-nê nùù sàhà-yá, te cahvi-néyà, chitánínì-né corona ndiaha-né nùù-yá, cachí-nè xì-yá:

11 Ndaníhí cahnú-nsí mii-ní, Stoho-nsì Dios, te ni coó tñũñuhu xí-nî nùù nsidaa ana itíácú, te ni cúsáhnú-nî nùù nsidaa ñuu. Ducán ndiá ìcà coo, vâchi mii-ní nì quidavâha-ní nsidanicuú iñàha, nì chitnùní inì-ní, te nì quidayucùn-ní nsidaa iñàha, te ñàyùcàndùá ndè vichi iá ì nsidaájàn.

5

Nansa nì quida Jesucristu xì tutu itúì

¹ Daaní, indéhi nùù silla ndiaha ndé iá mii-yá, te nì xinì ndahàcuàhá-yà iníndáhá-yâ iin tutu itúì. Te tutu mà, itándiaa letra ndùì laduà. Te nì xinì, ùsà lugar xan nuhní, te iin iin ndé nuhní mà itúú iin sellu. ² Daaní, nì xinì yucán iín iin ángel ndacuì, ndáhi fuerte-nè, ndácàtnùhù-né, cachí-nè:

—¿Ana nátùì cunduu ana cui nacani xì ñà-nùhí tutu yohó, te nuna-ña?

³ Doco, cunaha-nsiá, còò ni-iin ni túi nacani xì tutu mà, vâchi còò iin ni nátùì cui quida ducán, te cundehè-né ñà-itàndiaa yucán. Ni-iin ana iá ansivi, ni-iin ana iá ñuhiví yohó, ni-iin ana nduú nsii, ni-iin-ne màni cùí quida-neà. ⁴ Ñàyùcàndùá, nì quesahí sacú fuertí, vâchi còò iin nátùì nacuna xi tutu mà cahvi-neà, ni còò stná ana nátùì siquiera cundehè-neà. ⁵ Dandu nì càhàn iin nècuàchì sahnù-mà nì cachí-nè xì:

—Màsà cuácú-ní, vâchi sàni tùi ana cui nacuna xi tutu jaàn, te nandaxin-xi ùsà ñà-nùhí. Divi nduú descendencia ndiaha xí David, vâchi sàni cundee-yá (nùù contra xi-ya), ñàyùcàndùá vâtùni nacuna-yaña. Te nani stná-yà Nsicaaha nduú descendencia xi Judá, ducan nani stná-yà.

⁶ Te nì ndacotì, te nì xinì yucán iín mii-yá, na iin lelù náhà-yà, te ducán iá na ian nì sahnì nèhivì-yá, doco vichi iín-yá dava mahì-xí silla ndiaha, xì òcò cùmì nècuàchì sàhnú, xì nsi-cùmì ana itá saín nùù-yá. Ùsà nsiquì-yá na iin nsiquì riì, te ùsà nduchìnùù-yá. Cunaha-nsiá, nsi-ùsà nduchìnùù mà xínduu stná ùsà espíritu vaha xi Dios, te icutu ñuhiví xicánúú espíritu mà quidá-yá. ⁷ Te divi mii-yá iín dava mahì-xí yucán, nì tnàtuu-ya nùù ana iá nùù silla ndiaha, te nì tnii-ya tutu iá ndahàcuàhá-yàmà. ⁸ Te nì nsihi nì tnii-ya tutu ma, dandu nsicùmì ana itá nùù-yá mà xì nsidaa stná òcò cùmì nècuàchì sahnú-ma, nì tutuyuhu-né nùù sàhà mii-yá nduú Lelù Íi xí Dios. Nihí stná-nè iin iin yutnù cuerda quidandaa-né, te nihí stná-nè còhò oro chitu inciensu. Te inciensu mà, palabra nì cachi nèhivì na xicàn tàhvi-né nùù Dios nduá. ⁹ Daaní, nsidaa ana tutúyúhú ñuhù yucán, nì xito-ne iin alabanza saa, te nì inini mii-yá; te dohó cachí alabanza mà:

Icúmí-nì tnii-ní tutu itùì, te cahndè-ní ñà-nùhnà. Te vètùni quida-ní ducán, vachi nì xihì-ní, nì xitià nì-ní, te ducán nì dànáà-ní sàhà nèhivì. Te divi sàhámà vètùni nì yàha-ne nì sàcùnduu-ne nèhivì xí Dios, xínduu-ne nèhivì nsidanicuú raza cáhàn nsidanicuú dàhàn xí nsidanicuú ñuu inicutu ñuhiví. ¹⁰ Te nì chitnùnì inì-ní cunduu stná-nè nahì dùtù xinúcuáchì nùù Dios xi-nda. Te icúmí-nè dandacú-né nùù nèhivì dava ga ñuhiví. (Ducán cachí-nè xitó-né.)

¹¹ Daaní nì ndacotì inga xichi, te nì xinì sàni nataca yáha ga cuàhà sàstnùhù mil ángel mozo xi Dios, itá-né nsidanicuú ladu ndé iá Dios, xì ndé itá

nsìcùmì ana itá nùù-yá, xì stná ndé ndoó nècuàchì sahnú. Te nì tiacuì ¹² cáhàn ndee nsidanicuú-né, cachí-nè:

Ndiaha gá nì quida mii-yá ana nani Lelù Íi xí Dios, vèchi nì xihì-yà (sàhà nèhivì). Ñàyùcàndùá, icúmí-yâ sàà-yà cusahnú-yá, icúmí-yâ naquihin-ya ñà-cuicà ndiaha-yá, te icúmí-yâ cuiin fuerte-yà, te (dandacú) nchichí-yà nùù nèhivì; te mii-né, icúmí-né ndenihi cahnú-néyà, te tavà-né tnùñuhu xí-yá, vèchi naquímànì-néyà.

¹³ Daaní nì inini cáhàn ndee nsidanicuú ana xíndoo ansivi xì ñuhívì, xì nsidaa stná nsì, xì nsidaa iñàha nì quidavàha Dios, ñà-íá ñuhívì xì ñà-íá tècuì cuáhà, nsidanicuú ñà-jaàn, nì tiacuì xícatchi-nè:

Naquímànì-nsì mii-yá íá nùù silla ndiaha; te naquímànì stná-nsì mii-yá nani Lelù Íi. Quidáñúhú-nsì mii-yá, te ducanicoó nicanicuahàn. Te nì sàà-yà cusahnú ndiaha-yá nicanicuahàn, nì cachi-nè.

¹⁴ Dandu nì cáhàn stná nsìcùmì ana itá nùù-yá:

—Divi ducanicoó —nì cachi-nè.

Dandu nsì-ócò cùmì nècuàchì sahnú yucán, nì tutuyuhu-né nùù sàhà-yá, te nì cahvi-néyà.

6

Nansa icúmí cuu na cahnde Jesús iñù lugar ndé nuhní tutu itúì íá ansivi

¹ Daaní, nì xinì mii-yá nani Lelù Íi, nì sahnde-yá iin ñà-nùhní tutu itúìmà. Te nì tiacuì cáhàn iin ana iin saín nùù-yá; na cáhàn dàvì, ducán fuerte nì cáhàn-nè, cachí-nè:

—¡Naha!

² Te nì xinì nì quecunu iin idu cuxín. Te indánuú iin ana indánuú yàtà-sí, te nihí-né arcu. Te nì nihì stná-nè iin corona ñà-cuñuhu-ne. Ñàyùcàndùá, nì quee-ne cuàhàn-nè, vàchi icúmí-nê cundee-né nùu cuàhà ñuu.

³ Daaní, (nì xinì), nì sahnde-yà ñà-ùì nuhní tutu itúìmà, te nì tiacuì nì càhàn inga ana iín nùu Dios, te nì cachi-nè:

—¡Naha!

⁴ Te nì quecunu inga idu, idu cuahá nduú-si, te yàtà-sí indánuú inga ana indánuú, te icúmí-tê permisú dacà-té nèhivì ñà-nàá stnahá-né, te cahnì stnahá-né. Te nì sàha xi-té iin espada cahnú.

⁵ Daaní, nì sahnde-yà ñà-ùì nuhní tutu itúìmà, te nì tiacuì nì càhàn inga ana iín nùu-yá, cachí-nè:

—¡Naha!

Te nì xinì nì quecunu iin idu tnuu, te iá stná ana indánuú yàtà-sí, te iníndáhá-tê iin balanza. ⁶ Te tiacú càhàn ana càhàn mahì nsìcúmì ana itá nùu Dios, te dohó cachí-nè:

—Vichi ndiaá gà nùnì, quidáchúún-ndá iin quìvì, te cutu iin litro-ñà níhì-ndà; te nú cebada, cuisì iin quartillu dava; doco aceite xì vinu, cónì nàná yàhvi guá —cachí-nè.

⁷ Daaní, nì sahnde-yà ñà-cúmì nuhní tutu itúìmà, te nì tiacuì càhàn inga ana iín nùu-yá, cachí-nè:

—¡Naha!

⁸ Dandu nì xinì nì quecunu inga idu, te idu cuaán nduú-si. Te iá ana indánuú yàtà-sí. Te muerte nduú quìviá, te jaàn nchícùn gà vàxi ingà, te diviamà nduú ana ndaca-xi nèhivì cùhùn ndé ñuhú vaha anima nsì. Sàhà ndúì ñà-jaàn icúmí cui cuàhà nèhivì; nùu cada cùmì nèhivì icúmí cui iin-ne

quida, vâchi icúmîâ dandacúá nùù guerra, xì nùù tnama, xì nùù cuèhè, xì nùù quisì daná, te sàhà nsidaájàn icúmí cui cuàhà nèhivì.

⁹ Daaní, nì sahnde-yà ñà-úhùn nuhní tutu itúìmà, te nì xinì tìxi mesa ndé sáha-ne promesa xì Dios, yucán ndoó anima nèhivì. Xínduu-ne nèhivì xiníndísâ palabra ìì xí Dios, te sàhà ñà-jaàn nì sahnì nèhivì-né, vâchi nì cachi vate-né ndoó-né ladu xi-ya. ¹⁰ Te vichi, cána fuerte-nè, cachí-nè xì Yua-nda Dios:

—Stoho-nsì Dios, ¿nadaa ga quivì, dandu nacuitacùhá sàhà-nsí? Vâchi nèhivì ñuhiví, nì sahnì-né nsiùhù, ñàyùcàndùá xiñuhu ndoho-ne, vâchi mii-ní, ìì ndisa inì-ní, siempre tùha-ní quida vii-ní —nì cachi-nè.

¹¹ Dandu nècuàchì nsii ma, nì cutahvì-né iin iin dùhnù quihín cuxín yaa, te nì sàcùnaha-né cundiatu cuéyàà-nè quetatu chii gá-nè dècuèndè cui stná cuàhà compañeru-nè nchícùn ichì Dios, te cuacastnahá nsidaa ana icúmí cui stná nacua nì xihì mii-né.

¹² Daaní, nì sahnde-yà ñà-íñù nuhní tutu itúìmà, te nì xinì nì tnàa fuerte, te nì nàcùitnùù orá nahi sícoto tnuu. Te yoo, nì nducuahá stná-si nahi nì. ¹³ Te nì còyo chitu stná sìtnúù ñuhiví yohó, na ian cóyo ñà-vídi quidá tàchì, ducán nì còyo-sì. ¹⁴ Te nì ndañuhu ansivì nì natuíá na ian natuí iin tutu caní, te nsidaa yucù íá ñuhù íchí, xì nsidaa stná ñuu íá mahì mar, nì ndutá. ¹⁵ Dandu nsidanicuú nèhivì ñuhiví, nì xinù dèhé-nè yucù, nì chidèhé-nè mii-né ini cueva, te mahì cavà nahnú, xínduu-ne rey, xì gobiernu, xì nècuàchì cuicà, xì soldadu dandacú, xì nècuàchì idónuu, xì cuàhà stná-nè peón, xì nèhivì

ùún. ¹⁶ Te nì cacachi nsidaa-né xì yucù, xì stná cavà ducún:

—A sácú vaha ni cóya dìquì-nsí te dàhvi-nsi, ñà-màsà túi-nsi nùù mii-yá iá nùù silla ndiaha, te màsà níhì-nsí castigu quida mii-yá nani Lelù Íi. ¹⁷ Vàchi vichi sàni sàà quivì ndoho-nsi quida-ya, te còò iin cui cundee inì-xi na xídà ini-yà.

7

Nansa icúmí màcùtuu seña xi Dios tnaa cuàhà mil nèhivì raza Israel

¹ Daaní, nì nsihamà, dandu nì xinì cùmì ángel, itá-né nsicúmì ladu ñuhiví, te sadí-nè nùù tàchì caná nsidaa ladu sàhà-ñá màsà cáná gá tàchìmà nùù ni-iin ñuu, ni nùù mar, te ni nùù ni-iin yutnù. ² Te nì xinì inga ángel nì nana-ne vaxi-ne dècuèndè ndé caná orá, nihí-né sellu ducùn nèhivì xí Dios. Te nì ndàhì ndee ángel mà nì càhàn-nè xì nsicúmì tnaha-nemà, divi ángel nì sàha Dios poder ñà-quida-ne dañu xì ñuhiví xì mar. ³ Dandu dohó nì cachi ángel mà xì tnaha-ne:

—Màsà quídá-nsiá ni-iñàha xì ñuhiví, ni xì mar dècuèndè nú sàni ducùn seña xi Dios tnaa nèhivì xinúcuáchí nùù-yá.

⁴ Dandu nì inini nì nacani-ne nađaa nèhivì icúmí nihì xì seña mà, te nsidaa nsidaa-né, 144,000 nèhivì xínduu-ne. Te nsidaa-né, nècuàchì descendencia xi Israel nduú stná-nè. ⁵ Te iin dèhe Israel mà nani Judá, te (nì xinì) nì sàcùtuu seña mà nùù ùxìn ùì mil nèhivì descendencia xi nècuàchìmà. Daaní, nì sàcùtuu stná seña mà nùù ùxìn ùì mil nèhivì descendencia xi (ñani Judá mà) nani Rubén. Te nì sàcùtuu stná seña mà nùù ùxìn ùì mil nèhivì descendencia xi inga (ñani-nè) nani Gad. ⁶ Stná

ùxìn ùì mil nèhivì descendencia xi inga (ñani-nè) nani Aser, xì stná ùxìn ùì mil nèhivì descendencia xi inga (ñani-nè) nani Neftalí, xì stná ùxìn ùì mil nèhivì descendencia xi Manasés, nì dùcùn stná nsidaa-né seña mà. ⁷ Stná ùxìn ùì mil nèhivì descendencia xi Simeón, xì inga ùxìn ùì mil nèhivì descendencia xi Leví, xì stná ùxìn ùì mil nèhivì descendencia xi Isacar, nì dùcùn nsidaa-né seña mà. ⁸ Stná ùxìn ùì mil nèhivì descendencia xi Zabulon, xì stná inga ùxìn ùì mil nèhivì descendencia xi José, xì stná inga ùxìn ùì mil nèhivì descendencia xi Benjamín, nì dùcùn nsidaa-né seña mà.

Nansa nì xini Juan cuàhà mil nèhivì ndixí cuxín

⁹ Daaní, nì ndacoti, te nì xini yucán itá yáha ga cuàhà nèhivì, mà cùì nandiahvi nadaa xínduu-ne. Nèhivì nsidanicuú ñuu xínduu-ne, nèhivì nsidanicuú ladu xì nsidanicuú raza, te nsidanuu dàhàn xícahàn-nè. Te itá-né nùù mii-yá iá nùù silla ndiaha, xì nùù mii-yá nani Lelù Íì, ndixí-né dùhnù quihín cuxín yaa. Te iníndáhá-nè ndahà nù-ñùù.

¹⁰ Te cána fuerte-nè, cachí-nè:

Còò inga ana nahi Dios, divi mii-yá iá nùù silla ndiaha, vàchi sàni dàcácu-yàndó. Còò inga ana nahi mii-yá nani Lelù Íì, vàchi sàhà mii-yá sàni càcu-nda, nì cachì-nè.

¹¹ Daaní, nsidaa ángel mozo xi Dios, itá-né nsidaa ladu nècuàchì sahnú ndoó yucán xì stná nsicúmì ana itá nùù-yá, te nì tutuyuhu-né ñuhù nùù sàhà-yá ndé iá-yà nùù silla ndiaha xí-yá, te nì cahvi nsidaa-né mii-yá, ¹² xícachì-nè:

¡Amén! Mii-ní nduu-ní Dios, ñàyùcàndùá, ndaníhí ndiaha-nsí mii-ní, (te cachí-nsí xì-ní) yáha ga nchichí-ní. Sàhà nsidaájàn

naquímánì-nsí mii-ní, te ni coó tnũñuhu xí nsidaa nèhivì nùù-ní, te ni sàà-ní cusahnú ndiaha-ní, te ni sàà stná-ní dandacú fuerte-ní ìnicutu. ¡Ducanicoó nicanicuahàn!

¹³ Dandu nì càhàn iin nècuàchì sahnú yucán xì yúhù, cachí-nè:

—¿A ináhá-nî índù nècùachì xínduu nècuàchì ndixí cuxín yaa yohó? ¿A ináhá-nî índù nì quixi-ne?

¹⁴ Te nì cachì xì nècuàchìmà:

—Còó, có-ináhí, señor; doco mii-ní, ináhá-nî.

Dandu nì cachì-nè xì':

—Nècuàchì yohó, xínduu-ne nèhivì nì xini cuàhà vida tiempu nani tiempu xì tnũndoho cahnú. Doco sàni ndoo cuàchi-ne ñà-nì xitià nì mii-yá nani Lelù Íi, ñàyùcàndùá sàndixí cuxín yaa-ne vichi, ¹⁵ te xíndoo saín-né nùù silla ndiaha ndé iá Dios; ndui te ñuú xíxinucuachi-né nùù-yá, te ndoó-né ini vehe cahnú ndiaha-yá. Te mii-yá, nicanicuahàn cutnáhâ-yá xì-né ndiaá-yànè. ¹⁶ Ñàyùcàndùá mà nunca sàà-nè cui gà-nè doco, ni mà cúí gà-nè tècuíí, ni mà nsíi gà-nè quida orá, ni mà cúní ihni gà-nè.

¹⁷ Vàchi mii-yá nani Lelù Íi, icúmí-yâ cunuù-yànè. Íin-yá ladu nùù silla ndiaha yucán, te icúmí-yâ cundaca-yanè sàà-yà xì-né ndé coho-ne tècuíí ndiaha cutiacu-nè nicanicuahàn. Ni mà cuácú gà-nè, vàchi contentu cundoo-ne quida-ya.

8

Nansa cuàhàn cuu na tàhndè ñà-úsà ndé nuhní tutu itúí, te nachitu stná còhò oro inciensu

¹ Daani, nì sahnde-yà ñà-úsà nuhní tutu itúìmà, te nì nsihì nì quida-ya ducán, dandu nì nàcuíìn dàdí

inicutu ansivi nahi dava hora. ² Te nì xinì yucán nùù Dios sà-itá tùha ùsà gà ángel, nihí-né iin iin corneta ñà-sivi-nè. ³⁻⁴ Dandu nì tnàtuu inga ángel nì sàà-nè nùù iin mesa oro iá nùù silla ndiaha, divi mesa ndé sahmí-né inciensu nùù-yá. Te vichi nihí ángel mà iin còhò oro nì sàà, te nì sàha stná xì-né cuàhà inciensu ñà-cahmi-neà dìquì mesa mà sàhà-ñá cana ñùhmà-ñà mànana nùù Dios. Te na hora mà nana ñùhmà mà, dandu cutnahá stná palabra nì cachi nsidaa nèhivì xí Dios na ní xicàn tàhvi-né nùù-yá. Ñàyùcàndùá, divi ducán nì quida ángel mà, ndahà-né nì chitanini-ne nsidaámà nùù Dios. ⁵ Daaní, nì tavà-né chii ñuhu xìxìn nùù mesa oro mà, te nì dàquée-neà ini còhò mà ndè nì chituá, dandu nì dandiàchì ndee-néà nùù ñuhiví. Dandu nì tiacu cuàhà gá ana cáhàn fuerte, te nì cáhàn ndee dàvì, te nì tàsa, te nì tnàa.

Nansa icúmí cuu na sivi ángel corneta xi-ne

⁶ Dandu ùsà ángel nihí corneta xi-ne, nì nsidayu-cun-nè cuàhàn-nè sivi-nè.

⁷ Te nì sivi ángel primeru corneta xi-ne. Te na ní tiacu nì sivi, dandu nì còyo iin nùù ñuhiví, doco dácà stnahá iin ma xì ñuhu xìxìn, xì stná nì. Ñàyùcàndùá, nùù cada ùnì yutnù (itá ñuhiví) nì xìxìn iin-nù, te nì xìxìn nsihi stná yùcù iá campu.

⁸ Daaní, ángel ùì, nì sivi-nè corneta xi-ne, dandu nì xinì iñàha cuú mànau na ian iin yucù xìxìn, ducán nàhà, te nì nacava ini mar. Te cuàhà tècuìì mar nì nanduu-tè nì (nì quidamà). Iyuhu cumánì gá, te cunduu davatahvi tècuìì mar nì cuchicuehe ducán. ⁹ Stná nsidaa quisì ndùtè ñuhú ini mar, iyuhu cumánì gá, te cunduu stná davatahvi-sí nì

xihì. Stná barcu, iyuhu cumáni gá, te cunduu stná davatahvi-nú nì sachi.

¹⁰ Daaní, ángel ùnì, nì sivi-nè corneta xi-ne, te dècuèndè ñuhíví nì nacava iin sìtnúù cahnú nìsa ituu ansivi, xíxìn fuerte-sì, te tnúù nihni-sì na iin ñuhu cahnú. Te nì nacava-sì nùù ñuhíví nì còya nùù cuàhà yùte xì cuàhà pozo, iyuhu cumáni gá cunduu davatahvi yùte xì pozo nì còya nùù-xí.

¹¹ Te sìtnúù mà, Ajenjo nani-sí, te yáha ga nì ndu-uà yùcù tècuíí ndé nì còyo-sì. Te cuàhà gá stná nèhivì nì xihì ñà-nì xihì-ne tècuíí uà mà.

¹² Daaní, ángel cùmì, nì sivi stná-nè corneta xi-ne, te cuàhàn nsihi stná fuerza xi orá nì cùí, te cuàhàn nsihi fuerza xi yoo nì cùí xì stná sìtnúù; iyuhuni cumáni gá, te nsihi dava fuerza xi-sì. Ñàyùcàndùá, nì nanchiì ndahvi orá ndui, te nì nanchiì ndahvi yoo ñuú.

¹³ Te nì xinì meru dìquì-xí ansivi, yucán yáha ga ducún ndavá iin ángel, ndáhì ndee-né cachí-nè:

—Cunini nsidaa mii-nsiá nèhivì ñuhíví. Ndahví-nsiá, vàchi ndahví cuàhà cuàhàn cuu xi-nsiá, vàchi cumáni gá ùnì gá xichi sivi ángel corneta xi-ne, te ndahví-nsiá na hora sivi-nè.

9

¹ Daaní, ángel ùhùn, nì sivi-nè corneta xi-ne, te nì xinì dècuèndè ansivi xì dècuèndè ñuhíví nì nacava iin ana nchií nahi sìtnúù. Te nì nihì-né ndahàcáa ñà-nacuna-ne yavi cahnú cunú sàstnùhù. ² Te na ní nacuna-neà, dandu nì quecoyo cuàhà ñùhmà, na ian xíxìn ini xìtnù cahnú, te nì nanchiì ndahvi orá nì quida ñùhmà mà, te nì nàcuìtnúù inicutu.

³ Daaní, mahì ñùhmà mà nì caquee cuàhà sìca nì ndava-sì ñuhíví. Sàni nihìtáhvì-sí cucumi-sí iñù

ñà-cunduu-sì quisì daná nahi sìduhma. ⁴ Te nì sàcùnaha stná-sì ñà-màsà cáxi-sí yùcù itá ñuhiví, ni-iin stná ndahà yutnù, cuisì-ñá dandohó-sì nèhivì có-itúú seña xi Dios tnaà-xi. ⁵ Doco nèhivì tui-sì mà, mà cúí cúí-nè, còó, cuisì ndoho cuahà-né, na ian ndoho-nda na tuí sìduhma-ndó. Te ùhùn yòò icúmí cuu xi-né ducán. ⁶ Te mate nanducu-né modo cui dahuun-ne, doco mà níhì-né ñà-jaàn, mate yáha ga cucuni-nè ndañuhu-né ñuhiví, doco mà cúí.

⁷ Te nì xinì sica ma, te ducán ndáa-sì nahi idu fuerte sáhàn guerra. Dìni-sí, sìcàté oro ñuhá. Te nùù-sí, nahi nùù nèhivì nduá. ⁸ Te ididini-sí, na iá ididini nècuàchì ñahà, ducán iá`; te nùhu-sì, na iá nùhu nsicaha, ducán iá`. ⁹ Te icà-sí, nahi càa nduá. Te na ndavá-sì ansivi, yáha ga ndee cahá ndìxìn-sí, na ian cahá cuahà gá carreta ídítá idu, te cuahàn-nu guerra. ¹⁰ Te ndohò-sí, nihá iñù nahi sìduhma, vátùni tui-sìndó. Te ùhùn yòò icúmí-sì dandohó-sì nèhivì. ¹¹ Daaní, iá stná ana dandacú nùù-sí, divì nduú ñà-malu dandacú nùù yavi cunú mà; Abadón nani-sí nùù dàhàn hebreu, te nùù dàhàn griegu Apolión nani-sí.

¹² Pues, vichi sàni yáha iin tnùndoho chicá cahnú. Doco cumáni gá ùì gá tnùndoho nahnú fuerte.

¹³ Daaní, ángel iñù, nì sivi-nè corneta xi-ne, dandu nì tiacuì iá ana cáhàn yucán ndé iin mesa oro nùù Dios. Nsìcúmì esquina mesa mà itúú iin iin ñà-lá nahi nsiquì quisì, te mahì ñà-jaàn tiacú cáhàn iin ana cáhàn ¹⁴ xi ángel làcà ní sivi xì corneta-xi, te dohó nì cachi-nè:

—Cuahán-nì ndaxi-ní cùmì ángel nuhní yuhù yùte cahnú nani Eufrates.

15 Ñàyùcàndùá, ducán nì quida ángel mà, nì ndaxi-né cùmì ángel yucán, vàchi yucán ndoó tùha-ne sàà meru cuià, meru yòò, meru quivì, meru hora ñà-cacahnì-né cuahà nèhivì. Nùù cada ùnì nèhivì ñuhivì, icúmì cui iin-ne.

16-17 Dandu nì xinì na ian nì sànf, te nì xinì cuahà sàstnùhù idu, te itándoó nèhivì yàtà-sí. Ùì cientu millón nèhivì xínduu-ne, nì tiacuì, vàchi iá ana nì cachitnùhu nadaa-ne. Te xíndixi-ne dùhnù càa, color cuahá nduú dùhnù dava-ne, te dava ga-ñà color ndiaa, te dava ga-ñà, cuaán-ñà. Te dìni idu mà, na iá dìni nsicaha, ducán xí-ia-ñà. Te yuhù-sí caná fuerte ñuhu xì ñùhmà xì stná azufre (sahán aya).

18 Cunaha-nsiá, sàhà nsi-únì ñà-dàná queé yuhù-sí, sàhámà nì ca-xihì cuahà nèhivì, iyuhu cumánì, te cunduu davatahvi nèhivì ñuhivì nì caxihì nì quida ñuhu mà xì ñùhmà mà xì azufre dana ma. 19 Te iin iin idu, iá ñà-dàná nùù dìni-sí xì nùù ndohò-sí, vàchi ndohò-sí, na iá còò, ducán iá, te iá dìniá nahi còò, vātùni tui-sindó.

20 Doco nèhivì nì càcu nùù nsidaa tnùndoho nahnu-ma, nì cónì cùú-né arrepentir sàhà cuàchi nì caquida-ne nì quidayucun-nè ñà-nduá cahvi-né. Còó, iin-ni nì quida-ne seguir sàha-ne promesa nùù ñà-malu, te cahvi-né cuahà figura, sea oro nì cuyucàn, ò sea plata, ò sea càa yahá, ò sea yùù, ò sea yutnù nì cuyucàn. Te nsidaa ñà-nduá cahvi-némà, ni có-ìndéhá, ni có-itiácuà, ni có-xicá. 21 Te nèhivì ndóo ga ñuhivì, ni cónì nàxícócuìn ini-nè sàhà cuàchi-ne, iin-ni nì caquida-ne ñà-nduá xíquida-ne, sahní stnahá-né, sàhàn tàtnà-né, sàhàn tàdí-nè, te iá-nè xì ñàhà xí-né, te xidácuíhná stná-nè.

10

Angel iníndáhá libru tii

¹ Daaní, nì xinì vaxi inga ángel fuerte, mànuu-ne dècuèndè ansivi vaxi-ne. Ídúcùn-né iin vïcò, te ñuhú dìnì-né iin sìcòyàhnchì. Nchií nùù-né na ian nchií orá, te tnúù sàhà-né nahi ñuhu. ² Te iníndáhá-né iin libru tii nuná. Te nì sàcuìin-né ñuhíví, sàhà cuàhá-né ián dìquì mar, te sàhà itnì-né, ián dìquì ñuhù íchí. ³ Te nì ndàhì ndee-né, na ian ndàhì nsicaha, ducan tiacú. Daaní, nì nsihi nì ndàhì-né, dandu nì tiacu cáhàn iin ana cáhàn fuerte na ian cáhàn dàvì. Ùsà xichi nì cáhàn ana cáhàn mà. ⁴ Te yùhù, cuàhìn chitui ñà-nduá nì cachi-nè nì cùí, doco momentu mà nì tiacuì iá ana cáhàn ansivi, cachí-yà xì':

—Màsà chítúú-ní ñà-nduá nì cachi ana nì cáhàn ùsà xichi, te nì ìa na ian cáhàn dàvì, vàchi icúmí coo dèhé palabra mà —nì cachi-yà.

⁵ Daaní, ángel iín mahì mar xì dìquì ñuhù íchí, nì ndanihi-ne ndahàcuàhá-né ansivi, ⁶ te nì ndacùcahan-né mii-yá itiácú nicanicuahàn, divi mii-yá nì quidayucun xì ansivi, xì ñuhíví, xì mar, xì nsidaa iñàha iá lugar yucán. Te nì cachi-nè:

—Chináhí Dios, mà cuéé gà, ⁷ te sàà quìvì cuu ndisa nsidaa ñà-nduá nì cachitnùhu nèhivì xí Dios sàhana, vàchi na cuàhàn sivi trompeta xì ángel ùsà, dandísá, icúmí xìnu nsidaa ñà-nduá cuní Dios quida-ya, te iá dèhá` vichi.

⁸ Daaní, inga tu nì tiacuì iá ana cáhàn ansivi, te dohó nì cachi-yà xì':

—Tnàtuu-ní nùù ángel iín mahì mar xì dìquì ñuhù íchí, te tnii-ní libru tii nuná ini ndahà-né.

⁹ Ñàyùcànduá, nì tnàtui nùù-né, te nì cachì xì-né:

—Taxi-ní libru tii nùí.

Te nì cachi-nè:

—(Yoho íá`) Tnii-nià, te caxì-nià. Icúmí nduvidi yuhù-ní nahi ndudi ñùñù, doco nú sàni coco-nià, dandu icúmíâ ndu-uà-ñà tìxi-ní.

¹⁰ Daaní, nì tnii libru iníndáhá-nêmà, te nì saxià. Te (ñà-ndáà nduá), saxí vídià, nahi ndudi, doco nì nsihi nì coquiá, dandu nì nsicuihnú uà inì.

¹¹ Dandu nì cachi tu ángel mà xì’:

—Icúmí-ní cachitnùhu gà-ní ña-nduú razón ndi-aha xí Dios sàhà cuàhà nèhivì ndoó cuàhà ñuu cáhàn cuàhà dàhàn. Daaní, stná cuàhà rey dandacú nùù ñuu mà, icúmí-ní cachitnùhu stná-ní sàhà-té —nì cachi ángel.

11

Ùì nèhivì cáhàn cuenta xi Dios

¹ Daaní, nì sàha-ya yuhù iin vara caní nahi metro, te nì cachi-yà xì’:

—Ndacuiin-ní, cuahán-ní, chitacùhá-ní veheñùhu cahnú ndé cahvi nèhivì Dios, te chitacùhá stná-ní mesa ndé sàha-ne promesa ìì xí-né, te nacahvi stná-ní nadaa-ne sàhàn cahvi xì-yá yucán. ² Doco patiu yàtà veheñùhu màsà chítacùhá-ní, vàchi icúmí ndòamà ndahà tiàa inga raza. Tiàa ma, icúmí-tê cundoo-tè nsidanicuú gá lugar ñuu ìì, te quida quini-tè xì nèhivì yucán. Ùì dico ùì (42) yòò cunduu tiempu caquida-tè ducán.

³ Doco yucán cuàhàn cundoo stná ùì nèhivì-xí icúmí ñihítàhvì càhàn cuenta xi. Iin mil ùì cientu ùnì dico quivì icúmí-nê càhàn-nè xì nèhivì ñà-nduú razón xi. Te sìcoto cundixi-ne, sìcoto tnuu cundua —nì cachi-yà.

⁴ Cunaha-ní, mii-yá nduú-yá Stoho nsidaa ñuu iá ñuhiví. Te frente silla ndé iá-yà (ansivi) itá ùi nù-olivu, xì ùi candeleru. Pues na quidá nsidaa ñà-jaàn nùu-yá gloria, ducán quidá stná ùi nèhivì cáhàn cuenta xi-ya (ñuu mà). ⁵ Te nú xiní ùhì iin tiàa xi-né, te cuní-te quida quini-tè xi-né, dandu cuàhàn cana ñuhu yuhù-né coco-tè. Te ducán icúmí cuu xi nsidaa ana cuní quida quini xi-né. ⁶ Te ndahà stná ùi nècuàchìmà icúmí ndòo poder ñà-cadi xì dàvì ñà-màsà cuun ni-iin dàvì inii tiempu cáhàn-nè cuenta xi Dios. Te icúmí-nè dandacú stná-nè nùu tècuì ñà-nanduu-tè nì, te nú cuní-nè, vátùni dandohó stná-nè nèhivì nsidanuu clase tnùndoho, según nadaa xichi cuní-nè. ⁷ Daaní, nú sàni nsihi tiempu cáhàn-nè xì nèhivì cuenta xi Dios, dandu icúmí-nè cui-nè, vàchi iá iin quisì dàná iná cáá ini yavi cùnú sàstnùhù yúcán, te icúmí quisì ma nana-sì quee-sì, nàá-sì xi ndúi nèhivì cáhàn cuenta xi Dios mà, te icúmí-sì cundee-sì nùu-né, dandu cui-nè. ⁸ Te yucán mahì calle ñuu ndé nì xihì Stoho-ndà Señor nchìca cruz, yucán icúmí nsii ma cuitànduhù-né. Te divi ñuu mà, Sodoma cachí stná-nè xán, te Egipto cachí stná-nè xán, (vàchi malu gà modo xi nèhivì ndoó yucán). ⁹ Pues, ñuu yucán cuitànduhù nsii ma, te cundehè cuàhà nèhivì-né, nèhivì cuàhà raza ndoó cuàhà ñuu, te cuàhà dàhàn cáhàn-nè. Ùni quivì dava cuitànduhù nècuàchìmà yucán, ni mà cuàha nèhivì cundùxin-ne. ¹⁰ Al contrario, cuàhàn-nè cudiì ini-nè ñà-sàni xihì nsii ma. Cuàhàn-nè quida-ne vicò, te dacútàhvì stnahá-né iñaha, te cudiì ini-nè, vàchi còò gá ndúi nècuàchì sàhnú nì sacahàn cuenta xi Dios, vàchi antes cuàhà gá nì

ndoho-ne nì quida nècuàchìmà. ¹¹ Daaní, nú sàni yàha ùni quivì dava, dandu icúmí nsì ma nati-acu-nè quida Dios, te ndacuita-ne. Ñàyùcàndüá, yáha ga icúmí yùhí nsidaa nèhivì cundehè xì-né. ¹² Dandu icúmí tiacu tàchì ana cáhàn ansivi, te dohó cachi-yà:

—Nahà-nsia dìquì-xí yohó.

Dandu canana nècuàchì sàhnùmà dìquì-xí ansivi. Mahì vico nana-ne cùhùn-nè, cundéhe nsidaa nèhivì xiní ùhì xì-né. ¹³ Dandu divi hora mà, ndee gá icúmí tnàa ñuhiví. Nùù cada ùxìn vehe itánduhù ñuu mà, icúmí caà ian. Te icúmí cui ùsà mìl nèhivì sàhà-ñá icúmí tnàa guá ducán. Dandu nèhivì dava ga, cuàhà gá yùhí-nè, te nacuni-nè cahnú gá poder xi mii-yá iá ansivi.

¹⁴ Pues, ñà-jaàn nduú tnùndoho cahnú ñà-ùì. Doco cumàni gá ñà-ùni, te sà-ìtúú vaxa.

Nansa icúmí cuu na sivi ángel ùsà corneta xi-ne

¹⁵ Daaní, ángel ùsà, nì sivi-nè corneta xi-ne. Te nì inini ndee cána cuàhà-né ansivi, cachí-nè: Sàni sàà quivì cusahnú Stoho-ndà Señor nùù nsidaa ñuu ñuhiví, te nicanicuahàn icúmí-yá cusahnú-yá, mii-yá xì Dèhemani-yá Cristu.

¹⁶ Dandu òcò cùmì nècuàchì sàhnú ndoó nùù Dios dìquì silla vico, nì tutuyuhu-né nùù sàhà-yá, te nì cahvi-néyà, ¹⁷ cachí-nè:

Naquímanì-nsí mii-ní Stoho-nsì Dios, vàchi icúmí-nì nsidanicuú poder. Dècuèndè sàhana iá-ní, te nicanicuahàn icúmí-ní coo-ní. Ansivéhé-ní, vàchi sàni quesaha-ní cuàhàn-ní cusahnú dahuun-ní nùù ñuhiví, cuàhàn-ní dandacu-ní nùù nsidaa nèhivì ñuhiví. ¹⁸ Mii-né, nì xidà ini-nè, doco sàni

sàa quivì nachitacùhá-nînè castigu xi-ne. Te sàni sàa stná tiempu nsidandaà-ní sàhà nècuàchì nduú nsii. Te vichi icúmí cundiatú stná anima nsidaa ana xinúcuáchí nùù-ní, nacua nècuàchì cáhàn cuenta xi-ní, te ducán stná nsidaa gá ana xínduu nèhivì xí-ní, divi ana cahvi xi-ní, a ducán nduú-né nèhivì ùún, ò nèhivì chicá nì nihì chuun nùù-ní. Doco nèhivì nì quida quini xi ñuhiví, còò, vàchi icúmí-ní dandáñuhú-nînè, nì cachi nècuàchì sàhnùmà.

¹⁹ Daaní, nì nuna veheñuhu ìì xí Dios ansivi, te nì xinì ini veheñuhu ma iá caja ìì ndé inácaa palabra nì cachi-yà na ní ndòo sahnú-yá xì nèhivì xi-yá sànaha. Dandu yáha ga nì tàsa, te nì tiacu cahá fuerte; te ndee gá nì cáhàn stná dàvì, te nì tnàa. Te nì còyo stná iin.

12

Nansa nì xini Juan seña sàhà nècuàchì ñahà nì xinudèhé na ní xidà ini quisì cuahá

¹ Daaní, nì xinì iin seña cahnú ansivi. Nì natùì iin nècuàchì ñahà. Tìxi sàhà-né iá luna, te tnùù nihni ñà-nduá ndixí-né, vàchi orá nduá, te dìnì-né, ñuhá iin çorona ndé itándiaa ùxìn ùì sìnsví. ² Meru sà-itúú tùinuù mée xi-ne, ñàyùcànduá, ndáhì-nè, vàchi nì quicuehè-nè, cuàhàn cacu dèhe-ne. ³ Te nì tùì inga seña nùù ansivi. Nì quecunu iin quisì cahnú cuahá, caní-si nahi còò nahnu-guá, te cuahá laà-si. Ùsà dìnì-sí, te ùxìn nsiquì-sí itá. Cada iin iin dìnì-sí ñuhú sìcàté vico. ⁴ Te iá stná ndohò caní-si, te xi ndohò-símá nì caní-sì cuahà sìtnúù itándiaa ansivi, nì dandiàchì-ñásí nùù ñuhiví. Iin tantu sìtnúù mà nì ndiàchì nùù ñuhiví,

te ùi tantu-si nì ndòo ansivi. Dandu nì sàcuìn quisi mà nùù nècuàchì ñahà mà, ndiatú-si tùinuù mée xi-ne, vàchi cuní-si caxì-sívê na sàni cacu-ve. ⁵Dandu nì tùinuù-vé, tiàa nduú-vé, te nduú stná-vè mii-yá cuàhàn cusahnú nùù nsidanicuú ñuu, te mà cuáha-ya quida ndevàha-ne. Dandu (nì xinì) nì ndanchito-ya dècuèndè ndé iá Dios nùù silla ndiaha xí-yá.

⁶ Daaní, nècuàchì ñahà mà, nì xinudèhé-nè yucù dàná, vàchi yucán sàni nsidayucun Dios iin xaan ndé coo-ne, te yucán icúmí-nê nìhì-né ñà-cutiacu-nè iin mil ùi cientu ùni dico quivì.

⁷ Doco nì quesaha iá guerra ansivi. Ángel nani Miguel xì compañeru-nè nduú iin ladu, te quisi cuahá mà xì compañeru-si nduú inga ladu, te nì canáá stnahá-si. ⁸⁻⁹ Doco cóni cundéé-sí. Ñàyucànduá, nì taxi-nési ansivi, vàchi còò gá permisú cundoo gà-si yucán (ndé iá Dios). Nì dàndiàchì-yási nùù ñuhiví yohó, mii-sí, xì nsidaa ana nchícùn xì-sí. Vàchi quisi (cusahnuma), divi còò iá ndè sànahà nduú-si; ñà-malu nduú-si, te Satanás nani stná-si, te divi-sì nduú ana dandahví xì nèhivì inicutu ñuhiví.

¹⁰ Dandu nì tiacuì iá ana cáhàn fuerte ansivi, te dohó cachí-nè:

—Vichi sàni càcu nsidaa nèhivì xí Dios. Te sàni sàà quivì cusahnú fuerte-yà, te cusahnú stná Dèhemanì-yá Cristu. Vàchi sàni ndiachi ñà-malu fuera, vàchi divi-sì nduú ana daqúee cuàchi xi dìquì ñani-ndà (iin-ni cahvi stná xi Yua-nda Dios), vàchi ndui te ñuú dacuidá cuàchi-siné. ¹¹ Doco mii-né, nì cundee-né nùù-sí ñà-nì ndacùcahan-né mii-yá nani Lelù Íi, divi mii-yá nì xitià nì-xí sàhà-ndà. Nì cóni cáyùhí-nè, nì cachi vate-né nchícùn-nèyà,

vachi dispuestu nì sandoo-ne cui-nè, cóni cùhí ini-nè vida xi-ne.

¹² 'Pues vichi xiñuhu cudì ini nsidaa ana ndoó ansivi, (vàchi sàni cùxio ñà-malu). Doco nèhivì ndoó ñuhiví xì mar, ndahví-nè, vachi yucán sàni nasaà-si, xidà cuàhà inì-si, vachi ináhá-sî làcà iyuhu quivì ndóo nùu-sí (ñà-quida-sì ñà-nduá cuní-si).

¹³ Daaní, na sání cundaà inì-si ñà-sàni ndiachi-sí ñuhiví yohó nduá, dandu nì quesaha-sí náâ-si xì nècuàhì ñahà mà, divi nècuàhì nì tùinuù mèè xi. ¹⁴ Dandu mii-né, nì nihítáhvì-né coo ndìxìn-né nahi ndìxìn yanuni nahnú, te nì ndava-ne cuàhàn-nè yucù ndé coo dèhé-nè. Yucán icúmí-né lugar (dèhé) xi-ne ndé nihì-né ñà-cutiacu-nè ùni cuià dava, te ducán càcu-ne nùu còò mà. ¹⁵ Doco yuhù còò mà nì cana cuàhà tècuí nahi yùte, vachi cuní-si tnani nècuàhì ñahà mà; ¹⁶ doco nì chindee ñuhiví nècuàhìmà, vachi nì nsicà ñuhù nì ndèe nsihi tècuí nì cana yuhù-síma. ¹⁷ Ñàyùcànduá, nì xidà gà inì-si sàhà nècuàhì mà, te nì quesaha-sí xicánúu-si nandúcu-sî dava ga dèhe-ne, vachi, cuní-si quida quini stná-si xi nsidaa dèhe-ne chívaha xi ley xi Dios, te nchícùn vii xì ñà-nduá cachí Jesucristu.

13

Nansa nì ndecoyo ùi gà quisì daná

¹ Daaní, nì sàcuìn yuhù mar, te nì xinì mahì tècuí nì quecunu iin quisì daná, ùsà dìnì-sí, xì ùxìn nsiquì-sí. Te iin iin nsiquì-sí ñuhú iin sicàté vico. Te ìcà iin iin dìnì-sí itándiaa quivì-sí, iin quivì iá quini, te càhàn contra xi Dios. ² Nahi tigre, ducán náhà quisì nì xinì mà. Doco sàhà-sí, nahi

sàhà sì-oso, ducán ndáa-ña. Te yuhù-sí, nahi yuhù nsicaha, ducán iá`. Te quisì nì quecunu antes, te iá nahi còò, divi nùù quisì yucán nì nìhì quisì yohó poder dandacú-si nùù ñuhiví. Ñàyùcàndùá, ndee ní cusahnú-si; vâchi nùù inga quisì mà nì nìhì-sí coo-sì nùù silla cahnú dandacú-si. ³ Daaní, nì xinì nì nacuehè-si, iin dìnì-sí nì nacuehè, cuàhàn cuià cahín. Doco nì nduvàha ndé nì nacuehè xi-sì. Ñàyùcàndùá, nì ndulocó nsidaa nèhivì ñuhiví ñà-nì nduvàha-si. ⁴ Sàháyùcàndùá, nì cahvi-né quisì nahi còò chindéé xì quisì ùì mà ñà-dàndacú-sí. Stná quisì ùì mà, nì cahvi stná-nèsi, cachí-nè:

—Còò ana ndudává xí quisì jaàn. Còò iin cui cundee xi nùù-sí nú ni nââ-nè xì-sí —xícachi-nè.

⁵ Te nì nìhì stná-si ñà-màsà yúhí yuhù-sí càhàn ndevàha-sì dìquì Dios; ndee nì càhàn quini-sì dìquì-yá. Te nì nìhìtâhvi stná-si ñà-cusahnú-si ùì dico ùì (42) yòò. ⁶ Te ndee ní canàhá-si dìquì Dios, quini gá nì càhàn-si dìquì-yá, xì dìquì lugar ndé iá-yà, xì dìquì nsidaa ana ndoó cutnâhâ xí-yâ ansivi. ⁷ Te nì nìhì stná-si ñà-quida quini-sì xì nèhivì xí-yá, te cuàhà-né nì sahnì-sí. Te nì nìhìtâhvi stná-si ñà-dandacú-si nùù nsidaa raza nèhivì ndoó nsidaa ñuu, ndéni dàhàn nì cui càhàn-nè. ⁸ Te nsidanicuú nèhivì ñuhiví, cuàhàn-nè cahvi-nési. Doco ni-iin nèhivì mà, có-ìtúú quivì-né nùù libru xi Lelù íi. Vâchi cunaha-nsiá, dècuèndè na táyôo ñuhiví, dandu sà-itàndiaa quivì nsidaa ana icúmí cutiacu nùù-yá.

⁹ Ni cúniní vâha nsidaa nèhivì nansa cachí palabra yohó. ¹⁰ Nú ni chícádí nèhivì-ndó, dandu mii stná-nè icúmí-nê cundiadi stná-nè; te nú ni cahní nèhivì-ndó machete, divi machete icúmí-nê cui

stná-nè. Sàhà ñà-jaàn, xiñuhu cundoo-nda calma, te cunihnu vaha ini-ndà mii-yá, vachi nèhivì xí-yá nduu-nda.

¹¹ Daaní, nì xinì yucán nì quecunu inga quisì daná. Nùù ini ñuhù ñuhìví nì nana-sì. Itá ùì nsiquí-sí, nahi nsiquí lelü, doco nacua cáhàn quisì cahnú nahi còò mà, ducán cáhàn stná quisì yohó. ¹² Ladu nùù quisì nì quecunu nùù mar, jaàn iín quisì yohó, te sàhá chindéé quisimà-sí, ñàyùcàndüá quidá-si cùahà iñàha ndulocó nèhivì. Te quidá stná-si xi nèhivì ñuhìví ñà-fuerza cahvi-né quisì iá-si nùù-xí, divi quisì nì nacuèhè daná dìni-xí, te nì nduvàha-sì. ¹³ Te quisì iín yucán, cuàhà gá iñàha quidá-si ñà-quida tontó-te nèhivì, dècuèndè còyo stná ñuhu ansivì cundehè-né, ducán quidá-si, ¹⁴ dandáhvì-siné ñà-cuàhà guá quidá-si, vachi nì nihì-sí ñà-quida-sì ducán nú iín-si nùù inga quisì mà. Ñàyùcàndüá, cachí-si xi nèhivì ñà-quidayucun-nè figura cahnú cunduu quisì nì nacuèhè, te nì nduvàha ma. ¹⁵ Te figura mà, ndè nì dìtá` tàchá, vachi ducán nì nihì inga quisì mà quida-sì xán. Dècuèndè cáhàn stná nì quida quisì mà. Te nú có-càndísâ iin nèhivì cahví xán, dandu dandacú-si cui nècuàchìmà. ¹⁶ Te icúmí stná-si dandacú-si màcùtuu iin tnuni xi-sì icà nsi-danicuú nèhivì, ò sea màcùtua ini ndahàcuàhá-né, te ò nùù tnaa-nè. Doco nsidanicuú-né, icúmí màcùtuu tnuni mà icà-né, a sea ni cúndüú-né nèhivì nihí chuun, te ò nèhivì úún, ò nècuàchì ndahví, ò nècuàchì cuicà, ò iin peón-ni, ò iin lamú. ¹⁷ Vachi nú còò tnuni xi-sì, ò quivì-sí, te ò número xi quivì-sí icà-né, dandu còò permisui cuiin-ne ò dicò-né. ¹⁸ Cunaha-nsiá, palabra nchichí nduá cuàhìn cachì

xì-nsiá yohó. Iin nècuàchì nchichí, vètùni cahvi-ne nadaa nduá sáà número xi quivì quisì mà, vèchi número xi quivì iin tiàa nduá. Te divi 666 nduú número mà.

14

Alanbanza icúmí coto 144,000 nèhivì xí Jesús

¹ Daaní, nì xinì dècuèndè yucù Sión, te yucán iín mii-yá nani Lelù Íi, te cutnâhâ-yá xì iin cientu ùi dico cùmì mìl (144,000) nèhivì, te ìcà tnaa iin iin-ne itúú quivì Yuandiáhâ-yâ. ² Dandu nì inini ndè ansivi tiacú na ian cundáá nùù yutnù cuerda nani arpa. Te fuerte tiacú nahi tènùhu cuáhâ, na ian cáhàn ndee dàvì. ³ Te nì caxito nèhivì cuáhâ mà iin alabanza saa, itá-né frente silla ndiaha xí-yá ndé itá stná cùmì ana itá saín nùù-yá, te ndé ndoó stná òcò cùmì nècuàchì sàhnú. Doco ni-iin nècuàchì dava ga, mànicúì cutùha stná-nè coto-ne alabanza mà, cuisì nèhivì cuáhâ itá yucán, divi nèhivì xínduu iin cientu ùi dico cùmì mìl tiàa ma. Te nsidaa-né nduú nèhivì nì càcu nùù ñuhivì yohó nì quida (Jesucristu). ⁴ Te ni còò ni-iin cuàchi ni quidá-né xì nècuàchì ñahâ, vèchi cóni cáhàn-nè xì nècuàchì ñahâ ni-iin xichi. Te vichi, nchícùn-nè mii-yá nani Lelù Íi ndéni nì cui ni cùhùn-yâ. Antes mahì nèhivì ñuhivì nì sandoo-ne, doco vichi sàni càcu-ne ñà-nì dànáâ-yá sàhâ-né, te sàhájàn nì càcu-ne ñà-cunduu-ne na iin promesa chica ndiaha nùù Yua-nda Dios xì nùù Lelù Íi, ⁵ vèchi de por sí, mà túha-ne dandahví-nè; te nicanicuahàn ndoó-né nùù silla ndiaha ndé iá-ya, vèchi còò ni-iin falta xi-ne nùù-yâ.

Ùni razón nì cachitnùhu ùni ángel ndavá ansivi

⁶ Daaní, nì xinì ndavá inga ángel dìquì-xí ansivi, nihí-né razón vaha xi Dios, iin razón icúmí cunaha nicanicuahàn. Te cuahàn ángel mà cachitnùhu-neà xì nsidaa nèhivì nsidanicuú ñuu iá ñuhìví, nsidan-icuú raza-nè ndéni dàhàn nì cui cáhàn-nè. ⁷ Te dohó nì cachi ángel xì nèhivì mà:

—Cahvi-nsiá Dios, te tavà-nsiá tnùñuhu xí-yá, vachi sàni sàa quivì nsidandaà-yà sàhà cuàchi nèhivì ñuhìví. Ñàyùcàndüá, cahvi-nsiáyà, vachi divi mii-yá nduú ana nì quidayucun xì ansivi, ñuhìví, mar, xì nsidaa stná ndé caná tècuí.

⁸ Daaní, (nì xinì) nchícùn gà vaxi inga ángel, te dohó nì cachi-nè:

—Sàni ndañuhu ñuu Babilonia, sàni chàhmà dahuan nì quida Dios, vachi nì sàha nèhivì ñuu mà ñà-coho stná nèhivì inga ñuu, tè ñàyùcàndüá, nì xìnì stná nècuàchìmà, te quini nihnú stná ini-nè vichi. Ñàyùcàndüá, icúmí nècuàchì Babilonia mà nihí-né iin castigu fuerte —nì cachi ángel mà.

⁹ Daaní, nchícùn gà vaxi inga ángel, te vichi nduú ùni ángel sàni quecoyo. Te nì ndàhì ndee-né, cachí-nè:

—¡Ndahví nsidaa ana cahvi xi quisì daná mà ò figura-sì! ¡Te ndahví stná ana sà-ítuú tnuni xi-sì nùu tnaà-xi, ò ini ndahà-xí! ¹⁰ Vachi yáha ga icúmí-né ndoho-ne mahì ñuhu cahnú ndé xìxìn azufre sahán quini, te indéhe stná ángel ìì xí Dios, xì stná Lelù Íi. Te castigu mà, ducán quea na ian cuahàn dachó Dios-nè iin ndutè quini, te micuísì ndutè fuerte cunduu-tè, doco fuerza coho-nète, vachi xídà ini-yà sàhà-né. ¹¹ Ñàyùcàndüá icúmí-né cundoo-ne ndoho-ne nicanicuahàn ndé (xìxìn

ñuhu, te) caná ducún ñùhmà, ni mà nunca ñìhì gá-nè cundoo dadí-né, ndui te ñuú icúmí-né ndoho-ne, vâchi ñì cahvi-né quisì mà xì figura-si, te ñì sâcùtuu stná quivì-sí icà-né. ¹² Ñâyùcàndùá, cuahà paciencia xiñuhu cucumi nsidaa ñèhivì xí Dios, ñìvì nsidaa ana chívâha xi ley xi-ya, te nihnú vâha ini xì (Dèhemanì-yá) Jesús.

¹³ Daaní, ñì tiacu tu iá ana cáhàn ansivi, cachí-nè xì’:

—Vichi tiaa-yó palabra yohó cachí xùn: “Dècuèndè vichi xì quivì nùù-xí, ndiaha gá coo xi ñèhivì cui, te nú nduú-né ana nchícùn xì Stoho-ndà Señor”. Ñà-ndàà ndùá, cachí Espíritu ìì xí Dios, icúmí nècuàchìmà quetatu vâha-ne, mà ndóhó gá-nè nùù chuun quidá-né, te dècuèndè gloria nacuni stná mii-yá nsidaa obra ñì quida-ne.

Nansa cuàhàn cuu quivì último

¹⁴ Daaní, ñì xinì iin vîcò cuxín yaa, te nùù vîcò mà iá ana indéhe nahi mii-yá ana nduú Tnaha Ñèhivì Ñuhiví. Te ñìvì-yá, ñuhá iin corona oro, te iníndáhá-yâ iin hoz ñìvì. ¹⁵ Dandu ñì quee inga ángel nùù veheñùhu ìì xí-yá, te ñì ndâhì-nè ñì càhàn-nè xì mii-yá iá nùù vîcò, cachí-nè:

—Cahndè-ní viú ndanihi-ní cosecha, vâchi sàñì xida viú ñuhiví, te vichi sà-íá ndanchitoa.

¹⁶ Daaní, ñì sahnde-yâ viú iá ñuhiví, te ducán ñì ndanchito cosecha mà.

¹⁷ Dandu ñì quee inga ángel nùù veheñùhu ìì iá gloria mà, te iníndáhá stná-nè iin hoz ñìvì.

¹⁸ Dandu ñì quee inga ángel nùù ndé iín mesa ìì ndé cahvi-né Dios, te nduú-né ángel dandacú nùù

ñuhu xíxìn. Te nì ndàhì ndee-né, cachí-nè xì ángel iníndáhá hoz mà:

—Xì hoz dìin jaàn cahndè-ní nsidaa sì-uva caá nducuyòhò ñuhiví, vàchi sàni xìchi-sì —nì cachi-nè.

¹⁹ Ñàyùcànduá, nì sahnde ángel mà sì-uva ñuhiví xì hoz xi-ne, te nì dàtácá-nè nsidaa-sí nì dàquéé-nèsi ini lugar ndé chàhmà-sí quee tècuuì-si. Te seña ñà-ìcúmí-sí chàhmà-símà nduú ñà-ìcúmí Dios cuàha-ya nèhivì malu iin castigo fuerte. ²⁰ Vàchi cunaha-nsiá, fuera ñuu nì chàhmà-né, te nì xítia nì-né, ducán cuàhà nì mà nahi yùte ndé queé cuàhà tèñuhu, te cunú nì xìca (nahi ùi metro), na ian ducún iá frenu xi idu. Te ùni cientu kilómetro nduú ñà-càni yùte nì mà.

15

Ùsà ángel dandacú nùù ùsà tnùndoho chicá nahnú

¹ Daaní, nì xinì cuú inga seña ansivi, iin seña ndiaha. Te nì nduloquí, vàchi nì xinì ndoó ùsà ángel dandacú nùù ùsà tnùndoho chicá nahnú, te ñà-último nduájàn, vàchi sà-ìá, xì ñà-jaàn-ní mà cuídà gà ini Dios nú sàni yàha.

² Dandu nì xinì mar iá (ansivi) yucán, nahi vidriu nduá, te dácà stnahá stná vidriu mà xì ñuhu xíxìn, ducán náhà. Te nùù mar mà itá cuàhà nèhivì, xínduu-ne ana nì cundee nùù quisi daná mà, xì nùù figura-si, xì nùù número xi quivì-sí, nùù nsidaa ñà-jaàn nì cundee-né, te vichì itá-né yucán, nihí-né yutnù cuerda cundaa. ³ Te nacuatú stná-nè, xitó-né alabanza xi Moisés nì xinucuachi nùù Dios (sànaha), te xitó stná-nè alabanza xi Lelù Íi, cachí-nè palabra yohó:

¡Ndiaha gá nsidaa obra quida-ní, Stoho-nsi Dios; ndulócô-nsi ñà-cuàhà guá quida-ní! Nsi-danicuú poder icúmí-ní. Doco micuísì ñà-íá vii nduá quida-ní, cuisì ñà-íá vaha nacua ndiá ìcà. Ansivéhé-nî, vâchi rey nduu-ní, te cusáhnú-nî nùù nsidaa ñuu. ⁴ Te vichi xiñuhu cahvi nsidaa nèhivì mii-ní, Stoho-nsi Señor; xiñuhu nsidaa-nsi ndanihi cahnú-nsi mii-ní, vâchi cuisì mii-ní ì ndisa-ní. Te icúmí nèhivì nsidaa ñuu tnàtuu-ne cuitasisi-né nùù-ní, vâchi nùù nsidaa-né náhà claru íá vii nsidaa ñà-nduá nì quida-ní xì nèhivì ñuhiví.

Ducán nì cachi-nè.

⁵ Daaní, nì nsihamá, dandu nì xinì nì nuna quartu chicá ì íá ini veheñùhu xi-ya ndé íá vaha ley ì xí-yá. ⁶ Te nì caquee ùsà ángel mà vâxi-ne, diví ángel dandacú nùù ùsà tnùndoho nahnú icúmí ndoho nèhivì. Te ndixí-né sìcoto yéhè cuxín yaa, te nuhñí nchìca-ne iin sjuhma oro. ⁷ Dandu nì tnàtuu iin ana iin saín nùù-yá, te nì sàha-ne iin iin ángel mà iin yaxìn oro, chítu iin iin-sì castigu xì Dios, divi mii-yá itiácú nicanicuahàn, vâchi sàhà cuàchi nèhivì, ñàyùcànduá, xídà ini-yà. ⁸ Daaní ñà-ndiaha fuerte guá-yà, te ñà-ndee guá dandacú-yá, ñàyùcànduá nì cana ñùhmà, te nì xitià in-icutu veheñùhu ì mà. Te sàhà ñùhmà mà mànicuí nansihvi ga nì-iin nèhivì ini lugar mà decuèndé sàni nsihì ùsà tnùndoho nahnú dandacú ángel mà nùù-xí.

16

Nansa icúmí dacóyo ángel ñà-ñùhú ini ùsà yaxìn oro, divi ñà-nduú tnùndoho nahnú

¹ Daaní, nì tiacuì iá ana cáhàn fuerte ini ve-heñùhu ì mà, cachí-yà xì ùsà ángel mà:

—Cuahán-ndâ dacóyo-ndá ñà-ñùhú ini iin iin yaxìn mà dìquì ñuhiví ñà-cundua castigu fuerte sàhà-ñá xídà ini Dios sàhà cuàchi nēhivì —nì cachi-nè.

² Dandu nì quee ángel primeru nì dácóyo-ne ñà-ñùhú ini yaxìn xí-né dìquì ñuhiví. Ñàyùcànduá, nsidaa nēhivì itúú tnuni xi quisì daná mà, nì cana iin nsìhi ùhì ìcà-né, quini iá, te yáha ga cuhiá; nùù nsidanicuú ana cahvi xì figura quisì mà, nì cana nsìhi ùhì mà ìcà-né.

³ Daaní, ángel ùì, nì dácóyo-ne ñà-ñùhú ini yaxìn xí-né mahì mar. Te nì nanduu nsìhi tècuí mà nì, nahi nì nēhivì nì xihì. Ñàyùcànduá, nì xihì nsidanicuú quisì itiácú ñuhú mar.

⁴ Daaní, ángel ùnì, nì dácóyo-ne ñà-ñùhú ini yaxìn xí-né, nì còya nùù nsidaa yùte xì nùù nsidaa lugar ndé caná tècuí, te nì nanduu stná tècuí mà nì.

⁵ Dandu nì tiacuì cáhàn iin ángel dandacú nùù nsidaa tècuí, te nì cachi-nè xì Yua-nda Dios:

—Stoho-nsì Señor, mii-ní nduú ana iá ndè nicanicuahàn sàna. Te ì gá stná-ní, ñàyùcànduá, iá viì ñà-nduá sàni quida-ní xì nēhivì sàhà cuàchi-ne. ⁶ Vàchi mii-né, nì casahnì-né nēhivì vaha xi-ní; cuàhà tiàa nì cáhàn cuenta xi-ní nì casahnì-né, te nì xitià nì-né, ñàyùcànduá, divi nì nduá icúmí nècuàchì mà coho-ne quida-ní. Ducán icúmí coo xi-né, vachi malu-nè.

⁷ Dandu nì inini iá inga ángel yatni nùù mesa ì ndé cahvi-né Dios, te nì cachi-nè:

—Ñà-ndàà nduá, Stoho-nsì Dios. Nsidanicuú poder icúmí-nì, te micúsi ñà-ìá viì nduá sàni

quida-ní xì nèhivì sàhà cuàchi-ne, cuisì ñà-ndià ìcà nduá sàni quida-ní xì-né.

⁸ Daaní, ángel cùmì, nì dácóyo-ne ñà-ñùhú ini yaxìn xí-né nùù orá, te ñàyùcànduá nì nihitáhvi orá dansi fuerteà nèhivì. Nahi ñuhu xíxìn nì nandua, ⁹ te yáha ga cuàhà nì nsii-né sàhà ñà-ihni gá. Ñàyùcànduá, quini guá nì canàhá-nè dìquì Dios, vàchi divi-ya nduú ana nì dandácú coo tnùndohoma; doco cóni náxícócuìn ini-nè sàhà cuàchi-ne, ni cóni nácúni-nè ñà-vii nduá quidá-yá.

¹⁰ Daaní, ángel ùhùn, nì dácóyo-ne ñà-ñùhú ini yaxìn xí-né nùù silla ndé iá quisì daná mà, te nì nàcuìn tnùù inicutu ñuu ndé dandacú-si. Te nèhivì ndoo yucán, mà cùndéé gâ ini-nè dolor ndohó-né, ñàyùcànduá nì tnii nùhu-ne yáa-nè. ¹¹ Te nì canàhá quini-ne dìquì mii-yá iá ansivi ñà-cuàhà guá tnùndoho yáha-ne, te ndohó stná-nè sàhà nsihì ùhì nì cana ìcà-né. Doco ni sàhà ñà-jaàn cóni cùú-né arrepentir sàhà ñà-có-ndiáá quidá-né.

¹² Daaní, ángel iñù, nì dácóyo-ne ñà-ñùhú ini yaxìn xí-né dìquì yùte cahnú nani Eufrates. Dandu nì ndoco tèculiá, te ducán mà cádí yùte ma nùù soldadu cuàhàn cundaca rey inga ñuu caquixi ladu ndé caná orá. ¹³ Daaní, nì xinì nì quee iin sì-dicui yuhù iin iin quisì yucán. Ñà-malu nduú sì-dicui ma. Iin-sì nì quee yuhù quisì cuahá nahi còò, te ingà-si nì quee yuhù quisì nì quecunu mahì mar, te ingà-si nì quee yuhù quisì cáhàn cuenta xi quisì úi mà. ¹⁴ Te espíritu xi ñà-malu nduú sì-dicui ma, te nì quee-sì cuàhàn-si ñà-chiyuhù-sì nsidaa rey dandacú ñuhiví yohó. Cuàhà gá icúmì quisì mà quida-sì ñà-ndulocó rey mà, te candisá-te quixi-tè nataca nsihì-tè, cundoo tùha-tè sàà quivì

coo guerra, te cundua quivì cahnú xí Dios, divi mii-yá icúmí xí nsidanicuú poder.

15 Te vichi cachí-yà xì-ndà: “Cunaha-ndá, naànàá icúmí sàì ndé ndoo-ndá. Ñàyùcàndùá, cundoo tùha-ndá, te cunihnu vaha inì-ndá sàhá màsà cúcáhàn-nùù-ndâ na ian cucahan-núù iin nèhivì nú còò sicoto xi-ne”.

16 Daaní, nì nataca nsihi soldadu, xì stná tè-dàndàcú nùù-té, nì casaà-te iin xaan nani Armagedón, vâchi ducán nani lugar mà dàhàn hebreu.

17 Dandu ángel ùsà, nì dàcòyo-ne ñà-ñùhú ini yaxìn xí-né mahì ansivi. Te nì tiacu fuerte càhàn ndee ana càhàn ini veheñùhu ìì xí Dios ansivi. Divi mii-yá iá nùù silla ndiaha nduú ana nì càhàn, te nì cachí-yà:

—¡Sà-íá!

18 Dandu nì tàsa cuahà, te nì nìhi fuerte, te yáha ga nì càhàn dàvì, te nì tnàa fuerte sàstnùhù. Chicá fuerte nì tnàa nùù nsidaa xichi inii tiempu ndoó nèhivì ñuhiví. 19 Te ñà-ndee guá nì tnàa, ñàyùcàndùá nì tàhndè ñuu cahnú yucán, ùnì ñuu nì nandua. Te nsidaa gá stná ñuu ñuhiví, nì caà nsihi vehe yucán. Dandu nì nsinuu ini Dios sàhá ñuu Babilonia, ñà-cuàha-ya ñuu mà iin castigu cahnú, vâchi xidà ini-yà sàhá nsidaa cuàchi nècuàchì ñuu mà, ñàyùcàndùá cuahàn-yà quida-ya xì-né na ian dacohó-yánè iin ndutè có-cùnì-nè. 20 Dandu nsidaa yucù iá ñuhiví, nì ndèa ini ñuhù, te nì ndèe stná ñuu iá mahì mar. 21 Daaní, ndè ansivi nì còyo iin núù ñuhiví, nahnú sàstnùhù iin ní cacòyo ma, ùì dico kilo vèè iin ian, cunaha-nsiá. Te nèhivì ñuhiví,

quini ga nì dàquée cuàchi-ne dìquì Dios, vàchi yáha ga nì ndoho-ne ñà-nì còyo guá iin nahnuma.

17

Nansa icúmí ndoho ñahà malu

¹ Daaní, iin ángel nùù nsì-úsà nècuàchì xí-inindaha yaxìn, nì tnàtuu-ne nùí nì càhàn-nè xì' nì cachi-nè:

—Cùhùn-ndà dacuní' mii-ní nansa icúmí ndoho ñahà malu iá guá fama xì, te iá-ña ndé ñuhú cuàhà tècuíí. ² Divi ñahà mà nduú ana iá guá xì cuàhà tè-cùsáhnû ñuhiví yohó. Te divi nùù mii-ñá sàni cutùha stná dava ga nèhiví ñuhiví quida quini stná-nè nahi miá. Te queámà na ian iin-ni vinu xihí nsidaa-né xì-ñá, te ducán xini stná-nè —nì cachi ángel.

³ Ñàyùcànduá, ndacá ángel mà yùhù cuàhàn xicà-nsí dècuèndè ndé nduú yucù. Na ian sánì' quidá Espíritu Ìì xí Dios, ducán nduá cuàhàn-nsì. Te na ní sàà-nsì yucù mà nì xinì iá iin ñahà indánuú-ña iin quisì daná cuahá, ùsà dìnì-sí xì ùxìn nsiquì-sí, te itándiaa cuàhà quivì sìquini cáhàn contra xí Dios. ⁴ Te ndixí-ña sìcoto moradu vico, xì sìcoto cuahá laa, te nì nducutá oro xì yùù yéhè, xì stná sìdiqui cuxín vico. Te iníndáhá-ña iin copa oro chitu nsidaa ñà-có-ndiáá xì nsidaa ñà-sìquini, vàchi cuàchi ñahà mà nduú ñà-ñùhùmà. ⁵ Daaní, ìcà tnaà-ña itúú iin quivì ùhì mànihì ini-ndà. Dohó cachá': Ñuu cahnú Babilonia, divi ñahà nì dàcuàhà-xì dèhe yoco-xí ñà-quida quini stná-ña, te nsidaa ana quidá quini ñuhiví, xínduu stná-nè dèhe ñahà yohó, ducán cachá'. ⁶ Te nì xinì ñahà mà, na ian xini-ña, vàchi ñà-nì cudii guá

inìa sàhà ñà-nì xitìa nù nèhivì xí Dios, ñàyùcàndùá, ducán queá na ian xíni-ñà nì quida nù mà, vèchi nì cudiì guá inìa nì xihì nèhivì váha cáhàn vate sàhà Jesús. Te yùhù, cuàhà gá nì nduloquí` indéhi ñahà mà. ⁷ Dandu nì cachi tu ángel mà xí`:

—Màsà ndúlócô-nî, vèchi cuàhìn dacuní` mii-ní iñaha ñà-cundaà vaha inì-ní sàhà ñahà mà xì sàhà stná quisì indánuú-ña, divi quisì iá ùsà dìni-xí, xì stná ùxìn nsiquì-sí. ⁸ Cunaha-ní, antes nìsa ìa quisì mà ñuhiví, te vichi còò cá-si, doco icúmí-sí naque-cunu-sì quee-sì yavi cunú cuàhà, dandu después sàà-si ndañuhu dahuun-sì. Te cuàhà gá nèhivì ñuhiví, icúmí-nê ndulocó-nè na cuni-nè quisì mà ñà-nì ìa-sì ñuhiví, te còò cá-si, doco icúmí-sí nandecunu tu-sì. Doco nèhivì mà, ni-iin-ne có-itàndiaa quivì-né nùù tutu xi Dios. Vèchi tutu mà, dècuèndè na táyôo ñuhiví, dandu sà-itàndiaa quivì nsidaa nèhivì cutiacu nicanicuahàn.

⁹ Pues vichi, yohó iá iin palabra nchichí cundaà ini nècuàchì nchichí. Cunaha-ní, nsì-úsà dìni quisì mà, ùsà yucù nduá, te dìquì yucù mà iá ñahà mà.

¹⁰ ùsà stná rey ndoó. Ùhùn-te sàni yàha, te iin-tè, dandacú-te vichi, te iá stná ingà-te, doco cumàni gá quesàà-te. Daaní, nú sàni quesàà-te, dandu iin ratu tii icúmí-tê dandacú-te. ¹¹ Te quisì daná nìsa ìa, te vichi còò cá-si, pues divi quisì mà nduú stná-sì iin rey dandacuma, divi rey ùnà cunduu-sì, doco nùù ùsà rey primeru, iin-tè nduú stná-sì. Dandu después icúmí-sì sàà stná-sì ndañuhu dahuun-sì.

¹² Daaní, ùxìn nsiquì quisì mà, ùxìn rey xíndua, doco tàñáha ga nìhì-té ñuu ndé cusahnú-te. Cuisì imindaa hora nìhìtáhvi-té cutnahá-te xì quisì daná ñà-cusahnú-te. ¹³ Vèchi nsì-ùxìn rey mà, iin-ni

sàni candatnuhu váha-tè ñà-dayáha-tè ñuù-te ndahà quisì mà ñà-dandacú-si lugar xi-tè. ¹⁴ Te icúmí stná-te quida-tè guerra nàá-te xi Lelù Íi, doco mii-yá, icúmí-yâ cundee-yá nùù-té, vâchi Stoho-ndà Señor nduú-yá, te rey ndiaha nduú stná-yà, vâchi chicá fuerte-yà nùù nsidaa gá ana dandacú, xi nsidaa gá stná ana itá fuerte; te nsidaa ana nchícùn xi-yá, nèhivì nì cana-ya xínduu-ne, divi nèhivì nì nacàxin-ya, te iin-ni nchícùn-nè palabra xi-ya nicanicuahàn.

¹⁵ Dandu nì càhàn tu ángel cutnáhâ xí, cachí-nè:

—Cunaha-ní, nsidaa tècuí cuàhà ndé iá ñahà malu mà, nèhivì nduú-te, divi nèhivì ndoó cuàhà ñuu inicutu ñuhiví, vâchi cuàhà raza nduú-né, te cuàhà dàhàn cáhàn-nè. ¹⁶ Doco ùxìn rey nduú ùxìn nsiquì itá dìni quisì daná mà, icúmí-tê cuìdà inì-te sàhà ñahà mà. Ñàyùcànduá, cuàhàn-te dacúxíó-te nsidaa ñà-icúmí-ñâ. Còò ni-iñàha cucumiá. Dandu cahni-téñâ, te cahmi-téñâ. ¹⁷ Iin-ni icúmí nsidaa-tê nacani inì-te quida-tè ducán, vâchi icúmí Dios danácání ini-yàte quida-tè ñà-nduá nì chitnùnì ini-yà cuu, te sàhámà icúmí-tê cuàha stná-te quisì mà dandacú-si lugar xi-tè dècuèndè cuu ndisa ñà-nduá sàni cachitnùhu-ya antes. ¹⁸ Te cunaha-ní, ñahà nì xinì-ní mà, divi ñuu cahnú dandacú nùù nsidaa rey ñuhiví nduú-ña.

18

Nansa icúmí ndañuhu ñuu Babilonia

¹ Daaní, nì nsihì ñà-jaàn, dandu nì xinì mànuu iin ángel ansivi vâxi-ne. Iin ángel dandacú nduú-né, te nanchíi fuerte ñuhiví ñà-yéhè guá-nè. ² Te nì ndàhì ndee-né, cachí-nè:

—Sàni ndañuhu dahuun ñuu cahnú Babilonia. Te vichi cuisì ñà-malu xíndoo yucán, cuisì espíritu ía quini, vàchi sàni nanduu lugar yucán nahi nchihò nsidanuu laa sìquini. ³ Vàchi ndè nùu ñuu mà (nì quesaha cuàhà estilu sìquini nì cutùha nèhivì nsidaa gá ñuu, te nì quida-ne nahi ñahà malu mà), na ian iin-ni sàni xihi-ne xì-ñá, te xíni stná-nè. Daaní, cuàhà stná rey ndoo ñuhiví, nìsa xi-ìa stná-nè xì ñahà mà. Te nèhivì nacuín, te nadíco, sàni cucuica cuàhà stná-nè sàhà ñà-sìquini vico nì xiin nècuàchì ñuu mà.

⁴ Dandu nì tiacuì ía ana cáhàn ansivi inga xichi, te dohó cachí-yà:

—Nsidaa nsiohó nèhivì-xí, caquee-ndá nùu ñuu sìquini jaàn sàhà-ñá màsà quídá stná-ndá cuàchi na ian quídá vecinu xi-ndá jaàn, dandu mà níhì stná-ndá castigu nahi mii-né. ⁵ Vàchi ndè ansivi iín dini cuàchi-ne, te vichi sàni sàà stná quivì mà-cúndéé gá inì sàhà nsidaa ñà-có-ndiàá xíquida-ne. ⁶ Ñàyùcàndùá, vichi, nacula sàni quida quini-ne, divi ducán icúmí stná-nè níhì-né tnùndoho, decuèndè ùì tantu icúmí-né níhì-né sàhà cuàchi nì quida-ne, vàchi yáha ga tùha-ne quida quini-ne xì nècuàchì dava ga, ñàyùcàndùá, iin doble icúmí nacuitacùhá-nè. ⁷ Yáha ga cuadú-nè ndoo-né ñuhiví, cutu ndoo vico-né quídá ndevàha-ne nicanicuahàn. Ñàyùcàndùá, dava ni tantu icúmí-né ndoho-ne, te cundoo-ne tnùnsí ini, mate vichi nihnú ini-nè, cachí-nè: “Ndiaha mánì ía vida xi. Yùhù nduí ana dandacú, còò ni-iñàha cuu xí, ni mà nunca sàì coi tnùnsí ini”. ⁸ Doco sàhà-ñá nihnú ini-nè ducán, ñàyùcàndùá icúmí-né yàha-ne cuàhà tnùndoho, cuàhà gá icúmí-né ndoho-ne,

te tnana-ne, te coo stná tnama ñuu-nè, te cui cuàhà-né, dandu coco stná ñuu-nè. Te nsidaa tnùndoho ma, iin quivì-nì ìcúmí quixa dìquì-né, v àchi fuerte gà mii-yá ana cuàha xi castigu mà, v àchi divi Stoho-ndà Dios nduú-yá.

⁹ Daaní, nsidaa stná rey ñuhíví, icúmí-tê cuacu-tè, te cuhuun cuahà inì-te na cundehè-té xíxìn ñuu mà, te caná ñùhmà-ñà, v àchi mii-té, iin-ni nìsa cutnahá stná-te nì caquida-tè cuàchi nahi nèhivì ñuu mà, iin-ni nì sacutnahá stná-te xi-né cundoo vico-né ñuhíví. ¹⁰ Ñàyùcàndùá, xica itá-te ñà-yúhí-te nìhì stná-te castigu, te cachí-te:

—¡Ndahví nècuàchì ñuu cahnú Babilonia yucán!
¡Ndahví-nè! V àchi mate ñuu fuerte nì sandua, doco tìxi imindaa hora nì ndañuhu dahuan nì quida Dios.

¹¹ Daaní, stná tè-nàcuín te nadíco ndoó inicutu ñuhíví, icúmí-tê cuacu stná-te sàhà ñuu mà, te cuhuun cuàhà inì-te, v àchi còò cá nècuàchì ñuu ma cuiin xi ñà-nduá nihí-te dicò-té. ¹² V àchi nihí-te oro, xi plata, xi yùù yéhè, xi sìdiqui cuxín vico, xi sícoto cuxín finu, xi sícoto moradu, xi sícoto seda, xi sícoto cuahá, xi yutnú sahán viì, xi stná cuàhà iñàha nì cuyucun nùhu elefante, xi cuàhà iñàha nì cuyucun yutnú finu, ò càa yahá, ò càa uun, ò yùù finu mármol. ¹³ Te nihí stná-te canela, xi cuàhà ñà-nì nchico sahán tnamì, xi inciensu, xi vinu, xi tàtnà mirra, xi cutù, xi aceite, xi harina, xi trigu, xi idunsiquì, xi riì, xi idu, xi carreta, ndè stná nèhivì dicó stná-te. (Nsidaájàn nduá nìsa xiin nècuàchì ñuu mà.) ¹⁴ Ñàyùcàndùá, dohó icúmí cachi nèhivì xi nècuàchì ñuu mà:

—¡Ndahví-nsià! v àchi nsidaa ñà-vico xího guá-nsià, sàni ndañuhá. Nì saxixi v àha-nsia puru

ñà-chicá viì, te vico gá nì sandixi stná-nsiá, doco vichi còò cá ni ian mà, ni mà nunca tùi ga nùù-nsiá.

¹⁵ Cunaha-nsiá, cuàhà gá nì cucuica nsidaa tè-dìcò ma sàhà ñà-ndùá nì sadicò-té nùù nècuàchì ñuu mà. Ñàyùcàndùá, itá xica-té, (indéhe-té), yúhî-te ñà-càhnù-guá tnùndoho iá ñuu mà, te sacú-te, tnaná-te, ¹⁶ cachí-te:

—¡Ndahví nècuàchì ñuu cahnú yucán! Vàchi sìcoto cuxín finu nì sandixi-ne, xì sìcoto moradu, xì sìcoto cuahá, na iin nècuàchì ñahà ndixí vico ní nducutu xi oro, xì yùù yéhè, xì stná sìdiqui cuxín vico. ¹⁷ Doco cunaha-nsiá, tìxi iin hora-ni sàni ndañuhu nsidaa ñà-cuicà mà —nì cachì-te.

Daaní, nsidaa gá stná tiàa dacaca-xi barcu nahnú, itá xica stná-te, cutnàhâ-te xi peón quidáchúûn nùù-té, xì stná cuàhà tiàa sáhàn viaji inì-nu, ¹⁸ itá nsidaa-té indéhe-té ndé caná ñùhmà xíxìn ñuu mà, te cachí-te:

—¡(Na cuaha guá) nìsa là ñuu yucán! Còò cá ni-iin ñuu ndudává xân —cachí-te, ¹⁹ sacú-te, tnaná-te, sódò-te ñuhù dìnì-té, cachí-te— ¡Ndahví ñuu cahnú yucán! Vàchi sàhà nèhivì ndoó yucán nì cucuica nsidaa tè-ìcúmí xí barcu xicá mar, ñà-cuica guá ñuu-nè. Doco, ndahví-nè, vàchi tìxi iin hora-ni sàni ndutu nsihá —nì cachì-te.

²⁰ Pues vichi xiñuhu cudìi gá ini nsidaa ana ndoó ansivi, xì nsidaa stná nèhivì (ñuhivì) nì nìhì chuun nùù Dios, xì nsidaa stná profeta cáhàn cuenta xi-ya, xì nsidanicuú gá stná nèhivì xí-yá, vàchi vichi sàni nachitacùhá-yà sàhà ñà-quini guá nì quida nèhivì ñuu mà xì-né.

²¹ Daní, nì (ndecunu) iin ángel fuerte, nì ndanihi-ne iin yùù cahnú nahi yùù yódò xí

molinu, te nì dàndiàchì-néà mahì mar, te nì cachi-nè:

—Cunaha-nsiá, ducán icúmí cuu stná xì ñuu cahnú Babilonia mà, icúmíâ ndañuhu dahuan, te mà nunca gà sàà ndecunua. ²² Mà nunca tiacu gà cundáá yutnú cuerda ñuu mà, ni stná pitu, ni mà síví gà stná ni-iñàha cundáá, vàchi mà cóó gá ni-iin músico yucán, ni mà cóó gá ni-iin tiàa quida-xi oficiu xi-tè, ni mà tiácú gà stná nchicó ni-iin nècuàchì (ñahà). ²³ Ni mà cútnùù gà ñuhu ni-iin vehe, ni mà cóó gá vicò nandàhà novia xì noviu. Vàchi nsidanicuú ñà-jaàn, mà cóó gà, mate yáha ga cuica nì sandoo nsidaa tè-dìcò ñuu mà antes, chicá cuica nì sandàa-tè nùù nsidaa tè-dava ga ñuhiví. Te ndè ñuu mà nì sandoo cuàhà stná tètàtnà xì tètadí, te nìsa dandahví-te nsidaa gá ñuu.

²⁴ Te ini ñuu mà nì casahnì nèhivì cuàhà tiàa cáhàn cuenta xi Dios, xì cuàhà gá stná nèhivì vaha xi-ya. Ñàyùcàndùá, icúmí ñuu mà cunsida cuàcha sàhà nsidaa nsii ma, xì sàhà nsidaa gá stná ana nì xihì ñuhiví nì quida nèhivì.

19

¹ Daaní, nì nsihi ñà-jaàn, dandu nì tiacu cáhàn ndee cuàhà gá nèhivì ansivi, te dohó xícachi-nè:

¡Ansivéhé cahnú mii-yá! ¡Ansivéhé-yâ! vàchi sàni càcu dahuun nèhivì xí-yá. Yáha ga ndiaha nì quida-ya, ñàyùcàndùá, tavá-nda tñùñuhu xí-yá. Fuerte cusáhnû-yá vichi, vàchi Stoho-ndà Dios nduú-yá. ² Te cuisì ñà-íá vii sàni quida-ya, cuisì ñà-ndiá ìcà cuu nduá nì quida-ya na ní sàha-ya castigu ñahà malu íá guá fama xi, vàchi sàhà

mii-ñã nì cuchicuehe anima nèhivì ñuhìví ñã-nì sanchicùn-nè modo sìquini xi-ñã. Ñàyùcàndùá, vichi sàni nachitacùhá-yà cuàchi-ñã nì sahnì-ñã nèhivì xinúcuáchí nùu-yá.

³ Daaní, ñà-ùì nì cacachi nsidaa nèhivì mà:

—¡Ansivéhé cahnú mii-yá! —nì cachi-nè—. (Te yucán tuí xica) caná ñùhmà ndé xíxìn ñuu mà nicanicuahàn.

⁴ Dandu òcò cùmì nècuàchì sàhnú, xì nsicúmì ana itá saín nùu-yá, nì tutuyuhu-né nùu sàhà-yá ndé iá-yà nùu silla ndiaha, te nì cahvi-néyà, cachí-nè:

—¡Ansivéhé cahnu-ní, amén!

⁵ Daaní, nùu yatni silla ndiaha xí-yá nì inini cáhàn iin ana cáhàn, cachí-nè:

Xiñuhu ndanihi cahnu-nda Yua-nda Dios, nsidaa ndohó ana xinúcuáchí nùu-yá, te xícahvi xi-yá, a ducán nduu-nda ana nihí chuun cahnú nùu-yá, te ò nduu-nda nèhivì ùún.

Nansa cuàhàn coo vicò nandàhà gloria

⁶ Dandu nì inini cáhàn yáha ga cuàhà nèhivì, te ducán tiacú na ian cahá fuerte tènùhu cuàhà, na ian yáha ga ndee cáhàn dàvì, te dohó cachí nèhivì cuàhà mà:

¡Ansivéhé cahnú mii-yá! Vàchi vichi sàcùsáhnû-yá, te nduú-yá Stoho-ndà Señor, divi mii-yá ana cui quida nsidanicuú iñàha. ⁷ Ñàyùcàndùá, cuàhàn-ndà cudì cuàhà ini-ndà sàhà-yá, cuàhàn-ndà naquimani-ndâyá, vachi sàni sàà quivì nandàhà mii-yá nani Lelù Ìì. ⁸ Te vichì sàni nducutu ndiaha ana cuàhàn nandàhà xì-yá, vachi sàni nìhitàhvi-né

cundixi-ne sìcoto cuxín yaa finu còò ni-iin
mancha-xi, te na ian nchiá.

Ducán nì cachi-nè, vèchi nsidaa nèhivì xí-yá,
icúmí-né (cutnahá xi-yá cundoo ndiaha-né na ian)
nì nandàhà-né xi-yá. Te sìcoto cuxín ndixí-né, obra
vaha nì caquida-ne nduá.

⁹ Dandu nì cachi tu ángel mà xì’:

—Dohó tiaa-ní: “Nansicáhán nsidaa ana càna
cundoo vicò nandàhà xí mii-yá nani Lelù ì”.

Te nì cachi stná-nè xì’:

—Palabra ndàcuisì xí Yua-nda Dios nduá yohó.

¹⁰ Dandu nì tutuyuhí ñuhù nùù sàhà ana nì
càhàn xì’, cuàhìn cahví-nè nì cùí. Doco nì cachi-nè
xì’:

—Màsà quidá-nì ducán, vèchi cutu nduú stnái iin
ana xinúcuáchí nùù Dios, nacua quidá mii-ní, xì
dava ga compañeru-ní càhàn stná sàhà Jesús. Iin-ni
nduú stnái ñani-ní nahi mii-né. Còò; cuisì Dios
nduú ana ndiá ìcà-ndà cahvi-nda. Te nú càhàn
vate-nda sàhà ichì Jesús, dandu queámà ñá-iin-ni
quidá stná-ndà nacua nì saquida nècuàchì sàhana
nì sacahàn cuenta xi-ya —nì cachi ángel mà.

*Nansa icúmí cuu na nuu Jesús ansivi,
cuindànùú-yá idu cuxín*

¹¹ Daaní, nì xinì nì nuna ansivi, te nì quecunu
iin idu cuxín yaa, te indánuú mii-yá, divì mii-yá
nani Quidá ndise cumplir, te nani stná-yà Ma
túhe dandahví. Mii-yá, de por sí, quidá víi-yá
na nsidándàà-yà sàhà cuàchi, te quidá víi stná-yà
na sàhàn-yà guerra nàá-yà xì ana xinì ùhì xì-yá.

¹² Te nduchìnùú-yá, nahi ñuhu xíxìn, ducán iá’,
te dìni-yá, cuàhà corona vico ñuhá, te ìcà corona
mà itúú iin quivì-yá, doco ni-iin nèhivì có-ínahá

xí quivì mà, cuisì mii-yá ináhá-yâ. ¹³ Te ndixí-yá sìcoto nì nducuahá nì quida nì. Te nani stná-yà Palabra ìì xí Dios. ¹⁴ Daaní, dècuèndè ansivi nchícùn gà vâxi ana xínduu soldadu xi-ya. Cuàhà sàstnùhù-né, te itándoó stná-nè idu cuxín yaa, te xíndixi stná-nè sìcoto finu cuxín yaa. ¹⁵ Te yuhù mii-yá queé iin espada diìn, vâchi divi ñà-jaàn nââ-yà xì nèhivì nsidaa ñuu ñuhivì yohó, te ducán cundéé-yâ nùù-né, dandu dandacú ndee-yá nùù-né. Pues divi-ya nduú ana icúmí dacháhmà xì nèhivì xídà gà ini Dios sàhà-xí, vâchi mii-yá nduú-yá mii-yá. ¹⁶ Te itúú stná inga quivì-yá nùù capa-yà xì ìcà dìhin stná-yà, te ducán cachá`: Rey dandacú nùù nsidaa rey nduí, te nduu stnáì Stoho nsidanicuú ñà-ìá, ducán cachá`.

¹⁷ Daaní, nì xinì nùù orá, yucán iín iin ángel, ndáhì ndee-né, cachí-nè xì nsidaa laa ndavá ansivi:

—Nahà-ndá —nì cachi-nè—. Natacà-ndá ndé iá cuàhà iñàha caxi-ndá quida Stoho-ndá Dios. ¹⁸ Vâchi cuàhàn cui cuàhà rey, xì cuàhà gá stná tè-dàndacú nùù soldadu, xì stná cuàhà soldadu fuerte, xì stná idu, xì stná tè-itàndòó yàtà-sí, xì stná peón, xì stná lamú xi-tè, xì stná nècuàchì chicá idónuu, xì stná nècuàchì nchícùn cahà-xí.

¹⁹ Dandu nì xinì sàni nataca nsidaa rey ndoó ñuhiví, xì nsidaa soldadu xi-tè, itá-te xi quisì daná mà, vâchi cuní-si quida-sì guerra xì mii-yá indánuú dìquì idu (cuxín) xì nsidaa stná ana nchícùn xì-yá. ²⁰ Doco (cónì cundéé-sí), vâchi nì tñì-sí, mii-sí xì stná inga quisì nì sacahàn cuenta xi-sì, te nduú stná quisì mà ana nì saquida guá cuàhà iñàha na iín-si nùù quisì primeru mà, vâchi ducán nì nìhì-sí

nì dándàhví-si nèhivì ñuhiví, te nì sàcùtuu tnuni xi quisì mà nùù-né, te nì cahvi-né figura-si. Pues ndúì quisì mà, vivu nì dàndiàchì xì-sí ndé xìxìn ñuhu cahnú sahán quini nahi azufre. ²¹ Te soldadu dava ga xì-sì, nì xìhì-te nì quida mii-yá indánuú nùù idu. Divi xi espada queé yuhù-yá, ñà-jaàn nì sahnì-yáte. Dandu nì nataca nsidaa laa (nì càna mà), te nì saxì-sítê nì chitu tìxi-sì.

20

Nansa icúmí Jesús dandacú-yá mil cuà

¹ Daaní, nì xinì nì nuu inga ángel ansivi, nihí-né ndahàcáa xi yavi cunú cuàhà, te iníndáhá stná-nè iin cadena caní. ²⁻³ Te nì tnii-ne quisì cuahá nahi còò cahnú, nì chichuhni-nèsi nì chinacaa-nèsi ini yavi cunú mà, te nì sàcùndiadi vaha-sì ñà-màsà queé gà-si dècuèndè nsihi iin mil cuà ñà-màsà dándáhvì gà-si nèhivì ñuhiví. Vàchi còò mà nduú quisì xicánúú ñuhiví ndè sànaaha, divi ñà-malu nduú-si, te Satanás nani stná-si. Pues yucán nì sàcùndiadi-si, doco nú sàni nsihi mil cuà mà, dandu icúmí-sì dàñà-sí iin ratu tii.

⁴ Daaní, nì xinì, yucán itá cuàhà silla ndiaha, te dìquì-nú ndoó stná ana sàni nìhítáhvì nsidan-daà sàhà nèhivì. Te nì xinì anima nèhivì nì quendodò dìni-xí ñà-nì càhàn vate-né ndoó-né ladu xi Jesús, te ñàyùcàndùá nì xìhì-nè, vàchi iin-ni nì xinindisá-né palabra xi Dios, te sàhàmà cóni cándísâ-né cahvi-né quisì daná mà, ni cóni càhvì-né figura-si, nì cóni dúcùn-nè tnuni xì-sì ni ìcà tnaa-nè, ni ini ndahà-né. Ñàyùcàndùá, nì nati-acu-nè, te dava ni nì cusahnú stná-nè xì Cristu iin mil cuà, (nì xinì).

⁵ Cunaha-nsiá, ñà-jaàn cunduu primeru nátiácú nèhivì xínduu nsii. Doco dava ga nsii, còó, mà nátiácú-nè dècuèndè nsihi mìl cuià mà. ⁶ Te nèhivì natiacu primeru mà, nansicáhàn-nè, vèchi cunduu-ne nèhivì ndiaha xí Dios. Mà sáà-nè cui-nè ñà-úi. Còó, vèchi icúmí-nè cundoo-ne cucumí-nè chuun nù Dios nahi dùtù, te cunucuachi-nè nù mii-yá xì nù Cristu, te iin-ni cutnahá stná-nè xì Cristu cusahnú-nè iin mìl cuià.

⁷ Daaní, nì nsihi mìl cuià mà, dandu icúmí Satanás dàñà-sí quee-sì ndé ndiadí-sì, ⁸⁻⁹ cacanu-sì chiyuhù-sì nsidanicuú nèhivì ndoó inicutu ñuhiví. Stná (tè-dàndàcú nani) Gog, icúmí-sì dandahví stná-sité, mii-té xi nsidaa stná tè-ndòó ñuù-te Magog, dandu nataca nsihi-tè, nàà-te guerra xì ñuu ndé ndoó nèhivì xí Dios. Cunaha-nsiá, yáha ga cuàhà-té, nahi ñusi cuàhà ndoó yuhù mar, ducán cuàhà-té. Te nì quecoyo-tè nì nana-tè nì sàcuíta-tè nsidaa ladu ñuu ndé ndoó nèhivì xí mii-yá, mero ñuu cù-guá ini-yà sàhà-xí. Doco nì còyo ñuhu ansivi nì quida-ya, te nì sahmi nsiha tè-malu mà. ¹⁰ Te ñà-malu nì dandahví xì-té, nì dandiàchì xì-sì ini ñuhu cahnú ndé xíxin azufre sahán quini ma. Te cunaha-nsiá, mahì ñuhu jaàn, ndoó ì stná quisì daná xì stná quisì nìsa cahàn cuenta xi-sì. Te nsì-ùnì quisì mà, icúmí-sì ndoho-sì ndui te ñuú nicanicuahàn.

Juiciu final na mácò Dios nù silla cahnú cuxín, dandu ndàcàn-yà cuenta sàhà cuàchi nèhivì

¹¹ Daaní, nì xini iin silla cahnú. Ndiaha gá-nu, te cuxín yaa-nù, te yucán iá-yà nù-nú. Te (nì xini) nì ndañuhu ansivi xì ñuhiví, còó gá ñà-jaàn nù-yá, nì còó cá stná ni-iin lugar ndé coa. ¹² Dandu nì xini

stnái yucán nùù Dios nì sàcuìta nsidanicuú nsìi, nècuàchì cuìcà xì nècuàchì ndahví. Te nì ìa stná ana nì nacuna xi tutu ndoó yucán nùù-yá. Te nì nacuna stná-nè inga tutu más gà, divi tutu xi vida ndiaha nicanicuahàn. Dandu nì ndundaà sàhà cuàchi nì quida nsidaa nsìi ma, según nansa cachá` nùù nsidaa tutu primeru mà, según nansa nì quida iin iin-ne (ñuhívì yohó). ¹³ Te nì natiacu nèhivì nì càhà ini mar, xì nsidaa stná nsìi ndoó tìxi ñuhu, nsidaa anima ndoó vaha, nsidaa-né nì casaà-nè nùù-yá, te nì nsidandaà-yà sàhà cuàchi-ne según nansa nì quida iin iin-ne (na nì sandoo-ne ñuhívì). ¹⁴ Daaní cunduu quivì nsihi tiempu xíhì nèhivì nahi vichi, ni mà cóó vaha ga anima-nè, cutu ñà-cundoo dahuun-ne mahì ñuhu cahnu ma. Divi ñà-jaàn nduá icúmì cuu xi nèhivì nú sàni xihì-nè ñà-ùì cundua, icúmì-né cundoo-ne mahì ñuhu cahnuma. ¹⁵ (Vàchi nì xinì), nú cóni-nâtùì quivì iin nèhivì nùù tutu xi vida nicanicuahàn, dandu nì dàndiàchì xì-né mahì ñuhu cahnuma.

21

Ansivi saa xì ñuhívì saa

¹⁻² Daaní, yùhù Juan, nì xinì nì sàcòo ansivi saa xì ñuhívì saa, vachi ansivi nuu xì ñuhívì nuu, sàni yaha, te vichi còò gá ni-iin mar. Te nì xini stnái ñuu ìi nani Jerusalén Saa, ndè nùù Dios ansivi nì quea mànuu. Ndiaha gá iá`, vachi sàni nducutá na iin novia cuahàn nandàhà xì noviu. ³ Daaní, nì tiacui cáhàn ndee iin ana cáhàn ansivi, cachí-nè:

—Cunaha-nsiá, sàni sàà tiempu coo saín Dios xì nèhivì ñuhívì, vachi icúmì-yà cutnahá-yá xì-né ndé cundoo-ne. Te mii-né, nèhivì xí-yá cunduu-ne, te mii-yá, (cutnahá-yá xì-né) cunduu-ya Dios xi-ne.

⁴ Ñàyùcàndùá, nsidaa ndutènùù-né, icúmíâ ndèa quida-ya, mà cuácú gá-nè. Ni mà sàà gà-nè cui-nè, ni mà cóó gá-nè tnùnsí ini, ni mà tnáná gá-nè, ni mà cúhí gà-nè, vèchi mà cóó gá nahi antes.

⁵ Dandu mii-yá iá dìquì silla ndiaha cahnú, nì cachi-yà:

—Cunaha-nsiá, cuàhìn quidayucun saí nsidan-icuú iñàha.

Te nì cachi stná-yà xì’:

—Tiaa-ní palabra yohó, vèchi palabra ndisa nduá, mà dándáhvîà ndohó.

⁶ Dandu nì cachi-yà:

—Sà-íá. Nahi letra nuu nani A, ducán nduí, vèchi sàhà yùhù nì sàcòo nsidaa ñà-íá. Te nahi letra dan-sihi nani Z, ducán nduú stnâi, vèchi nsidaa iñàha, sàhà yùhù cucumiá fin xan. Cunaha-nsiá, nú iá ana xíhì tècuíi ndiaha, yùhù icúmî cuàhi-nè cuàhà tècuíi mà, vèchi iá ndé ndéa-tè caná ducún-te, coho nèhivì cutiacu-nè nicanicuahàn. ⁷ Te nsidaa ana cundee xi nùù ana cuní datúcù xì-né, icúmí-nê ndutahvì-né nsidaa iñàha. Te yùhù cundui Dios xi-ne, te mii-né cunduu-ne dèhi. ⁸ Doco nsidaa nècuàchì ìa, xì nècuàchì có-xìníndísâ, xì nècuàchì quidá quini, xì nècuàchì sahní, xì nècuàchì tùha cundoo ñahà-xí, xì nècuàchì sáhàn xì promesa nùù yucù, xì nècuàchì cahví xi yùù yócò ò figura, xì nsidaa stná nècuàchì tnùhù, (ndahví-nè), vèchi ñuhu cahnú nduú lugar ndiatù xì-né, divi ñuhu xíxìn xì azufre sahán quini. Ducán icúmí cuu xi-né na cui-nè ñà-úì.

Ñuu Jerusalén Saa icúmí nuu ndè gloria

⁹ (Inaha-nsiá), ndoó ùsà ángel nì sa-icumi xi yaxìn ñuhú ùsà castigu mà. Pues iin-ne nì quixi nì càhàn-nè xì', cachí-nè:

—Nahà-ní dacunî mii-ní ana nduú nahi novia, vâchi iá ana cunduu nahi ñahàdihí mii-yá nani Lelù Í.

¹⁰ Dandu Espíritu ìlì xí Dios, nihí-yá yùhù nì tuxi cuàhàn xìqué ndè iin yucù cahnú ducún, te nì dàcùnì-yà yùhù ñuu ìlì nani Jerusalén, dècuèndè nùù Dios mànuà ansivi vâxan. ¹¹ Nchií yéhè ndiahá quidá-yá, na ian yéhè guá iin yùù ndiaha yáha ga ndiaá, vâchi nahi yùù yéhè nina nani jaspe, ducán nchií ndai-ña. ¹² Te ndiadí ñuu mà iin nama cahnú sàstnùhù, te ducún-ña, te ùxìn ùì yehè icúmíá. Iin iin yehè mà itá iin iin ángel. Te ìcà yehè mà itándiaa quivì descendencia ùxìn ùì dèhe Israel. ¹³ Te iin iin ladu ñuu mà iá ùnì yehè. Ladu ndé caná orá iá ùnì. Te ladu norte iá ùnì stná, xì stná ladu sur xì ladu quécahnú orá, iin iin ladu mà iá stná inga ùnì yehè. ¹⁴ Te sàhà nama ñuu mà itánduhù ùxìn ùì yùù nahnú xínduu cimientu xan. Te nùù cimientu mà itándiaa quivì ùxìn ùì nècuàchì nì nihì chuun nùù mii-yá nani Lelù Í.

¹⁵ Daaní, (nì xinì) iníndáhá ángel nì càhàn xì' iin nù-iin oro ñà-chitacùhá-nè ñuu mà xì yehá xì stná nama xan. ¹⁶ Cunaha-nsiá, cùmì ladúà, vâchi iin-ni itácùhá nsicúmì ladúà. Te na ní chitacùhá ángel ñuu mà xì nù-iin xi-ne mà, dandu iin mil ùì cientu (1,200) kilómetro itácùhá-ña. Te ñà-ndúà caníá, divi ducún-ña, te divi xica stná-ña. ¹⁷ Dandu nì chitacùhá stná-nè nama yucán, te ùnì dico cùmì (64) metro nì quee ñà-ducún-ña. Na chitácùhá nèhivì ñuhivì, ducán nì chitacùhá ángel mà ñuu mà.

18 Cunaha-nsiá, yùu jaspe nì cuyucun nama mà, te ñuu mà, micuísì oro finu nduá. Te na nchií ndai vidriu, ducán nchií oro mà. 19 Te cimientu nama mà, ndiaha gá iá', vàchi puru yùu yéhè xínduu cavà mà, nsidanuu clase yùu yéhè. Cavà primeru xi cimientu xan nduú iin cavà cahnú puru yùu yéhè nani jaspe. Daaní, nchícùn gá indúhu cavà nduú puru yùu zafiro; te parte ùnì nduú puru yùu ágata; daaní, ñà-cúmì, puru yùu esmeralda nduá; 20 te ñà-úhùn, puru yùu ónice nduá; te ñà-íñù, puru yùu cornalina nduá; te ñà-úsà, puru yùu crisólito nduá; te ñà-únà, puru yùu berilo nduá; te ñà-îñ, puru yùu topacio nduá; te ñà-úxìn, puru yùu crisoprasa nduá; te ñà-úxìn iin, puru yùu jacinto nduá; te ñà-úxìn ùì, puru yùu amatista nduá. 21 Te ùxìn ùì yehè nama mà, ùxìn ùì ñà-vico sibóla cuxín nani perla nì cuyucàn, iin mindaa perla cahnú nì cuyucun iin iin yehè. Te calle chicá ndé xicá nèhivì ñuu mà, mii oro finu nì cuyucàn, nahi vidriu nchií nihnú.

22 Cunaha-nsiá, còò veheñùhu nì xìní ñuu yucán, vàchi inicutu ñuu mà cahvi-né mii-yá icúmí-xí nsidanicuú poder, divi Stoho-ndà Dios xì mii-yá nani Lelù Í. 23 Te có-xiñùhù nècuàchì ñuu mà ni-iin orá, ni-iin yoo cunchiì yucán, vàchi mii Dios nchií ndiaha inicutu; mii-yá nani Lelù Í itnúù-yà yucán. 24 Ñàyùcànduá tnúù ñuu mà, vátùni tuí núù nèhivì xicánúú yucán. Te icúmí casaà nèhivì nsidaa ñuu, xínduu-ne nèhivì nì càcu anima-xi. Te rey ndoó ñuhivì yohó, nihí-te ñà-cuicà-té quécoyo-tè ñuu mà, te dócò-téâ. 25 Te mà nunca cundiadi yehá, vàchi nicanicuahàn cundua ndui, te mà nunca sàà cuñaà. 26 Te yucán xínu stná ñà-vico iá cuàhà

ñuu ñuhíví yohó, te cóyo stná nsidaa nècuàchì idónuu, nihí-né ñà-cuicà-né sáa. ²⁷ Doco mà nunca quìhvi ni-iin ñà-sìquini yucán, ni-iin tè-nìhnú quini inì-xi, mà quìhvi-tè yucan, ni-iin stná tètñùhù. Cuisì quìhvi nèhivì itándiaa quivì-xí nùù libru icúmí mii-yá nani Lelù Íi, divi nduú libru xi vida ndiaha nicanicuahàn.

22

¹ Daaní, nì dàcùnì ángel mà yùhù iin yùte caná dècuèndè ndé iín silla ndiaha xí Yua-nda Dios, xì Lelù Íi. Ndai gá tècuì ñuhú, na ian nchií-te. Te tècuì coho-nda, te cutiacu ndiaha-nda nduú-te. ² Te (nì xini stnáì) mahì ichì cahnú ñuu mà itá fila cuahà yutnù, yutnù xí vida ndiaha nicanicuahàn nduú-nu. Te itá stná-nu nduì ladu yùte ma. Te ùxìn ùi clase quisi vídì sáha-nù. Iin iin yòò sáha-nù diín diín quisi vídì. Daaní, ndahà cuì-nu, ñà-jaàn cutátná nèhivì ñuhíví ñà-nduvàha-ne. ³ Te inicutu ñuhíví mà cóó gá ni-iñàha nì tàhvi chíhán, cuisì icúmí coo Yua-nda Dios xi Lelù Íi dandacú-yá, te cundoo stná nèhivì xí-yá cunucuachi-né nùù-yá. ⁴ Icúmí-nè cundehè-né nùù-yá, te màcùtuu stná quivì-yá tnaa-nè. ⁵ Te mà nunca cuñàà yucán. Ñàyùcànduá, còò gá necesidad cucumi-né ñuhu cutnuù nùù-né, ni còò stná necesidad cucumi-né iin orá cunchiì nùù-né, vàchi mii Stoho-ndà Dios icúmí cunchiì nùù-né ñà-cutuì nùù-né. Te nicanicuahàn icúmí-nè cundoo-ne cusahnú stná-nè.

Sà-itúú naxicocuìn Jesucristu ñuhíví, cachí-yà

⁶ Daaní, nì cachi tu ángel mà xì:

—Palabra ndàcuisì xí Stoho-ndà Dios nduá sàni cachì xì-ní, vètùnì cahvi nèhivì xán. Vàchi iin

ángel xi mii-yá nduú ana nì quixi nì cachitnùhu xi nsidaa ana xinúcuáchí nùù-yá sàhà-ñá cundaà ini-nè nansa icúmí cuu yàchì. Vàchi ducán nì saquida stná-yà sàhana, nì techuún-yá nèhivì ìì xí-yá quixi-ne cachitnùhu-ne palabra xi-ya.

⁷ (Dohó cachí Jesucristu:)

—Cunaha-nsiá, yàchì màsàì ndé ndoó-nsiá. Te ndiaha gá icúmí cundiatú nsidaa ana chivàha xì ñà-ndúá cachitnùhu nùù tutu yohó (—nì cachi-yà).

⁸ Yùhù Juan, nì xinì nsidaa ñà-jaàn, te nì inini nsidaa ñà-ndúá nì cuu. Daaní, nì nsihi nì xinì, te nì inini, dandu nì tutuyuhí ñuhù nùù sàhà ángel nì dàcùnì xì' nsidaámà, cuàhìn cahví-nè nì cùí. ⁹ Doco nì cachi-nè xì':

—Màsà quídá-nì ducán. Vàchi yùhù, iin-ni nduú stnàì iin ana xinúcuáchí nùù Dios, iin-ni (nchícùn stnàì mii-yá) nahì mii-ní xì ñàitnaha-ní cáhàn cuenta xi-ya, te iin-ni chivàha stnàì nacua cachí nùù tutu yohó. Còó, micuísì Dios cahvi-ní.

¹⁰ Te nì cachi stná-nè xì':

—Màsà chídèhé-nì ni-iñàha cachitnùhu nùù tutu yohó, vachì sà-ìtúú cua.

¹¹ 'Ñàyùcàndúá, vichi ni cúnahá tèmalu ni quidá-te seguir quida quini-tè; stná tètùha quini, ni quidá-te seguir quida-tè ducán, (mà cútnúnì). Doco nècuàchì nihnú ndàà cuisì inì-xi, iin-ni ni quidá-né seguir quida vùù-né ducán, te iin-ni ni cóó ndoo anima-nè.

¹² (Te dohó cachí stná Jesús:)

—Cunaha-ní, yàchì naxicocuín ndé ndoó-nsiá, te cunihi iin ñà-vàha xi-nsia sàì dacútâhvì' iin iin-nsia, según nansa nì quida vùù iin iin-nsia.

¹³ Ndè sàhana iá yùhù, te ndè nicanicuahàn coi.

Ñàyùcàndùá, ducán ié` nahi letra nuu nani A, xì stná letra dansihí nani Z, vâchi sàhà yùhù nì sàcòo nsidanicuú iñàha, te còò ni-iñàha, chicá cunaha nùí.

¹⁴ 'Ndiaha gá coo xi nsidaa ana nsida ndoo xi anima-xi; vâchi ducán queamà na ian sàni ndoo vâha sìcoto xi-ne (te sàndìxí víi-né). Nsidaa ana quida ducán, nihítáhvi-né caxì-né quisì vídà yutnú tàtá cutiacu-nè nicanicuahàn, te nihítáhvi stná-nè quìhvi-ne yehè nahnú ñuu-yà (cundoo-ne yucán). ¹⁵ Doco nsidaa nèhivì tùha quini, mà sàà-nè quìhvi-ne, ni mà quìhvi stná tètàtnà, ni-iin stná tètàdí, ni-iin stná tètòò cundoo ñahà-xí, ni-iin stná tè-sàhni canúú, ni-iin stná tè-càhvi xì yùù yócò ò figura, te ni-iin stná tètùha dandahví.

¹⁶ 'Yùhù nduí Jesús, te nì techuín ángel-xi sàà-nè càhàn-nè xì nsidaa mii-nsiá nèhivì natácá ndácùcahan xí, te nì cachitnùhu-ne xì-nsiá nsidaa palabra yohó. Pues yùhù nduí descendencia xì rey David. Te na ian quidá stná sìtnúù cahnú xínu dàtnàà (cachítñùhu-sì túinuù quìvì sàà), divi ducán quidá stná yùhù —nì cachi Jesús.

¹⁷ Te dohó cachí stná Espíritu ìì (xì iin iin ana tàyóo vida ndiaha xí):

—¡Nahà-ní! (cunindisa-ní Jesús), —cachí-yà xì-né, te ducán cachí stná nèhivì xínduu nahi novia cuahàn nandàhà (xì-yá).

Te nsidaa stná mii-nsiá ana sà-iníní xí palabra yohó, divi ducán xiñuhu cachi stná-nsiá, ñà-nì tnátuu nèhivì nùù-yá. Daaní, stná yùhù, càhàn stnáì xì nsidaa ana cuní (cucumi xi vida ndiaha), cachí` xì-né:

—Nahà-nsiá (cunindisá-nsiá mii-yá), te nìhìtáhvi-nsiá coho-nsiá tècuìí cutiacu-nsiá nicanicuahàn, ni mà chíyàhvi-nsiá.

¹⁸ Cunaha-nsiá, dohó cachí` xì nsidaa ana iníní xí ñà-ndùá cachí Dios nùù tutu yohó: màsà chíyódo gá-nsiá más nùù ñà-ndùá cachá`, vàchi nú jaan, dandu cuàhà castigu nìhì stná-nsiá nùù-yá, divi castigu cachítnùhu libru yohó sàhà-xí. ¹⁹ Te nú ni cándiáá iin nèhivì iyuhu ñà-ndùá cachí-yà nùù tutu yohó, dandu dandutu stná-yà quìvì-né nùù libru xi vida ndiaha nicanicuahàn, te mà nunca nìhìtáhvi-né cundoo-ne ñuu ìì xí-yá nacua cachí tutu yohó.

²⁰ (Dohó cachí Jesús vichi:)

—Yùhù nduí ana nì cachi xì-nsiá nsidaa ñà-jaàn, te cachítnùhu stnàì xì-nsiá ñà-yàchì icúmî naxicocuûn ndé ndoó-nsiá —cachí-yà.

Pues ducanicoó, Señor Jesús. Yàchì cuní-nsì naxicocuûn-ní.

²¹ Ni cúcúmí nsidaa-nsiá gracia xi Stoho-ndà Jesucristu. Amén.

Ley saa ni nacao Jesucristu
New Testament in Mixtec, Southern Puebla
(MX:mit:Mixtec, Southern Puebla)

copyright © 1978 Wycliffe Bible Translators, Inc.

Language: Mixtec, Southern Puebla

Translation by: Wycliffe Bible Translators, Inc.

Mixteco, Sur de Puebla [mit], Mexico

Copyright Information

© 1978, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Southern Puebla

© 1978, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

a5d5d5cd-4240-5e2e-8a5d-f08f5c4f964a